

Apocalipsis, cjuua xi sua cumachaya naja

Cjuua tsëhë Jesucristu xi cafehecani chini rë Juan

1 Cjuua vihi ne, cjuua tsëhë Jesucristu xi casua Nina cojo sa xi tsingacun Jesucristu xuta ladu rë me xcusun xi hatuxa sahmi nguujyë xi cuatjú. Cjuua jan ne, ngu ángel cafehecani ná, ngahan xi hmí ná Juan, ngu mosu hndixahan rë me. ²Hane ngahan ne, tsinguíxë ta cjuaquixi yëjë xcusun xi cahvë hya, xcusun tsëhë cjuua rë Nina cojo tsëhë cjuaquixi xi chja Jesucristu. ³Jemu ndaja tsëhë me xi cuichjasun me cjuua rë xujun vihi, hacuaha jemu ndaja tsëhë me xi cuihndë me cuincha me xahasen rë me cjuua xi camahindu xcun xujun vihi, tsëhë xi ha camá tiña nixtin xi cuma chihin cjuua rë.

Cjuua xi catsihindu Juan xi cafachatsja yatu yungun xi tjin ngajan Asia

⁴Ngahan Juan ne, tsihindú cjuua vihi xi cjuahatsja yatu yungun xi tjin ngajan nangui Asia. Chjuhunnuntsun cjuandaja cjuajeya tsëhë Nina, me xi hacui, hacui ni me xi cavejña me hatsëë, hacuaha hacui ni me xi cuejña cuaha, hane

cojo tsëhë Hasen rë me xi siu xcun me xi hacui sacuaha yatu hasen.

⁵Hacuaha cojo tsëhë Jesucristu, me xi má testigu cjuaquixi, me xi tjun tjun cavuya cjuahñu tsëhë ngajñi rë nima, me xi hacuaha matitjun tsëhë yëjë ni xuta xi matitjun tsëhë ngasunhndë, hane me xi hmucacun naja hacuaha cavaxëtje naja tsëhë jyë naja hya xi cavanga jni rë me xi cahme me. ⁶Hacuaha Jesucristu ne, casahmi me xi ngayaan ne, satë naja xi cuitexan ne, hacuaha cuma yaan sacuaha nahmi xi chjahancuendan Nina, Nina xi hacuaha má me nahmi rë me. Me vëhë ne, catimá jyë hnga me hacuaha catimá titjun me yëjë ni nu, yëjë ni nixtin. Cuatjin jain.

⁷iNutsujun, ta cuinduva me cojo yuff! Hacuaha yëjë ni tuxcun ne, scuëë rë me. Hisca cojo me xi cahndiin tsëhë me ne, scuëë rë me. Hane yëjë xuta tsëhë jimangu tjë rë xuta ngasunhndë ne, cuatju me cjuandusin ngatsë rë me. ¡Cuatjin cumá! ¡Cuatjin jain!

⁸Cuitjin chja Nina: “Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin. Ngahan

xi tejña, hane ngahan xi vijnetaha. Cavéjña hatsëë, hacuaha cuéjña cuaha. Yëjë ni má sahme.”

Juan ne, cavutsejen me xi jyë hnga Jesucristu

⁹Ngahan Juan ne, xingun má ngahan, tangun satë naja cjuañihi, tangun nechan ngahma gobiernu hacuaha tangun caa naja ngatsë rë xi mangutacun cojo Jesús. Ngahan cavitejñataha ngu nandya xi hmí rë Patmos xi vetjucaa tsëhë ndachacun. Ngajan tejñataha ngatsë rë xi cachjá cjuarë Nina cojo tsëhë cjuaquixi xi chja Jesús. ¹⁰Hya xi camá ne, nixtin xi chjaharcun Nina ne, Hasen rë Nina ne, cavisehentë cjuatacun naha. Hora vëhë ni ne, tsëhë taha ngaxtun ne, cahndë ngu xta xi jemu hñu camahani nuhya rë, nuhya rë sacuaha xta rë tyjo ¹¹hane cuitjin cachja:

—Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Chjehe ngu xtë xujun ne, nihndi xcusun xi tichutsijin hane sehe ningatjin catahatsja xuta yungun xi siu yatu nandya Asia xi cuicun vi: Efeso, cojo Esmirna, cojo Pérgamo, cojo Tiatira, cojo Sardis, cojo Filadelfia cojo Laodicea. —Cuitjin cachja xta jan.

¹²Hya xi camá ne, cavuya xi scutséjen yo xi tichja cojo ná, peru xi tu cavuya ne, xi cahvë ni ne, yatu candeleru xi camá tsëhë oro. ¹³Hane vasencja rë candeleru jan ne, jiyajñi ngu xihin xi tsejen sacuaha Quihndi rë Xuta Jain. Yaja me ngu tsjian tjin të ni xi vechu

hiscu ntsacu me, hane tjihñucja hiscan ndanisin rë me cojo ngu pañu nduju camá cojo nachjun tsëhë oro. ¹⁴Hane rcu cojo tsjarcu me ne, tyava tsejen sacuaha tsejen tyava tsja rë chu tsánga o sacuaha tsejen hnchan xi vixu. Hane tuxcun me ne, tsejen sacuaha ndihi xi ña vitjen. ¹⁵Ntsacu me ne, seti sacuaha quicha sine xi catsicjë ndihi xutsë rë; hane xta rë ne, nuhya rë sacuaha xta rë nandan xi tjemu hñu vanga. ¹⁶Tsja xi ladu quixi ne, vahangui me yatu niñú. Hane tsëhë hntsua me ne, vetju ngu espada yuju xi vatë taha xcun cojo taha ngaxtun. Hane xcun ne, tsejen sacuaha tsuhi hya xi sua hasen cojo yëjë ni ngahñu rë.

¹⁷Ngajan xi ngahan ne, xi cahvë xcusun rë me ne, catícja taha ntsacu me sacuaha xi cahme ngahan. Ngajan xi cavisane me tsja me ladu quixi xcun yojo naha, sehe cachja me cojo ná cuitjin:

—Xi carcuin. Ngahan xi ntsacu vetsihin ne, hacui ni ngahan xi vijnetaha. ¹⁸Ngahan, quicun ngahan. Cavéya, peru quihndë tacunntsa llavi tsëhë cjuaveya cojo tsëhë Hades, cahndé hiscan siu nima. ¹⁹Hindë ngaye ne, nihndi xcusun xi cahye vi cojo xcusun xi tijima quihndë cojo xcusun xi sehe cumá. ²⁰Sacuaha yatu niñú xi cahye hntsa ladu quixi naha cojo yatu candeleru xi camá tsëhë oro jan ne, cuitjin vijne cjuatacun hma jan: yatu niñú jan ne, hacui ángel xi sua cumachaya rë xuta rë yatu yungun jan cjuarë Nina, hane yatu candeleru jan ne, hacui yatu yungun jan.

**Cjua xi cjuahatsja yungun
ngajan nandya Efeso**

2 'Hindë nihindi cjua vi xi cjuahatsja ángel rë yungun ngajan nandya Efeso. Cuitjin nihindi: "Cjua vihi ne, cjua rë cha xi vahangui yatu niñú jan tsja ladu quixi cha hacuaha tsujyihya cha vasencja rë yatu candeleru jan xi camá tsëhë oro: ²Ha ndaja hvë tsëhë xa nuju sacuaha cjuandaja xi nihñu, jemu chja tivatjun peru ticaa nuju titsangun nduju cojo. Hvë xi tuun rë xuta tsehen cahndé ta, nichuvun cjuatacun rë xuta xi vindacha me sacuaha xi má me apóstol. Hane camachaya nuju xi tu vindacha ni me. ³Hacuaha titsangun nduju hacuaha ticaa nuju cojo cjuacjintacun xi tivatjun ngatsë rë xi veyunnangun ñihi naha, hacuaha machuvaain cjuatacun nuju ngajñi rë cjuacjintacun jan. ⁴Peru cojo yëjë sa ne, tjin ná vihi condra nuju ta, hacuiin jemu nihmutacún ná sacuaha xi canihmutacún ná hya xi titjun camangutacún cojo ná. ⁵Vëhë xi ninguitsjun hacutjin cavatjun hya xi tjin nuju cjuahmutacun vëhë, hane nindeyun cjuatacun nuju ne, cuyun nihñu nga xcusun sacuaha xi canihñu titjun. Cuatjin nihñu ta, sa tsajin ne, cuinduvá tjëngë nuju ne, cuaxëxen candeleru xi satë nuju tsëhë cahndé rë. ⁶Peru hacuaha tjin sa nuju ngu xcusun xi ndaja tsujun ta, ndaja tsujun tsëhë xi choho hyun xcusun xi sahmi xuta xi tjengui me cjuachacun tsëhë Nicolás, ta cjuachacun jan ne, hacuaha cojo ngahan ne, choho hvë.

⁷Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhuncun. Cuitjin chja: Yo xi scaa rë cjue xcun tsëhë cjuatsehen ne, suá rë cahndé xi sinë tuhaxi xi sua cjuahñu xi vaqui rë ya xi secun cahndé ndajyihí xi tsëhë Nina."

**Cjua xi cjuahatsja yungun
ngajan nandya Esmirna**

⁸'Hindë nihindi cjua vi xi cjuahatsja ángel rë yungun ngajan nandya Esmirna. Cuitjin nihindi: "Cjua vihi ne, cjua rë cha xi matitjun hacuaha matjengui. Cjua rë cha xi cahme jan hane hacuaha cavuya nga cjuahñu. Hacui cjua vihi: ⁹Ha hvë cjuacjintacun xi tivatjun cojo cjuayuma nuju. Peru ngajñi rë vëhë ne, inchina ngayun! Hacuaha hvë cjua chjataha rë xuta vë xi chja me xi xuta tjë rë Israel, o sa xuta rë Nina, má me, peru quixiin ta, xuta ladu rë Satanás má me. ¹⁰Xi carcuun tsëhë xcusun xi cúatjun cuatjin. Naain ne, tsitsehen cha xuta cojo sa xi scandiaya me yahnga ngayun ndavaya sehe chjahachuva nuju. Hacuaha tsujihihya tjengui nuju xuta jan cojo cjuañihi xcun të nixtin ni. Peru tangunnduju cojo cjuatacun nuju handasa xi cueyun, hane ngahan ne, suá nuju corona rë cjuahñu. ¹¹Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhuncun. Cuitjin chja: Yo me xi scaa rë cjue xcun ne, tsajin mé choho cuatju me tsëhë cjuaveya xi majo."

**Cjua xi cjuahatsja yungun
ngajan nandya Pérgamo**

¹²'Quihndë nihindi cjua vi xi cuahatsja ángel rë yungun ngajan

nandya Pérgamo. Cuitjin nihindi: “Cjua vihi ne, cjua rë cha xi tjin rë quicha yuju, xi vatë taha xcun cojo taha ngaxtun. Cuitjin chja cha: ¹³Ha hvë cahndé jani hisca nechuntuhun, ta cahndé vëhë ne, cahndé hñu xi vitexa Satanás. Peru cojo yëjë sa ne, ndaja mangutacún cojo ná. Handasa hya xi catsiquehen me Antipas, me xi catsinguixi cjuaquixi naha ngajan cahndé hñu xi vitexa Satanás ne, hisca hya ne, hacuiin cavitjayun ndiya rë xuta xi macjain rë me ngahan. ¹⁴Peru hacuiin yëjë tsujun ndaja ta, tjin ná ngu jo xcusun condra nuju ta nijyuntacún tsëhë ngu jo me ngajñi nuju xi tjengui me cjuachacun rë cha Balaam. Cha vëhë catsingacun cha Balac chuva rë hacutjin tsitsehen cha xuta nangui Israel nixtin hatsëë. Hane casahmi me jyé xi cajnë me yojo tsëhë cjuatjo rë nina ndyojo, hacuaha xi casahmi me cjuatsehen xi satë rë cjuachacun jan. ¹⁵Hane hacuanitjin ngayun, ta ngajñi nuju siu me xi hacuaha tjengui rë cjuachacun jan, cjuachacun rë cha Nicolás. ¹⁶iNideyun cjuatacun nuju! ta, sa tsajin ne, ha nduvá tjëngë nuju, hane sahme si cojo rë me xi cuacun vë cojo quicha rë cjua xi vetju ntsuva. ¹⁷Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhuncun. Cuitjin chja: Yo xi scaa rë cjue xcun ne, suá rë comida cjuarcun xi hmí rë maná xi jiyahma, hacuaha suá rë ngu ndyojo lihndi tyava hiscan camahindu ngu ñihi xatsë, ngu ñihi xi tsajin yo vëë rë, ta suva me xi cjuahatsja rë ne, suva ni me vëë me.”

**Cjua xi cjuahatsja yungun
ngajan nandya Tiatira**

¹⁸Hacuaha nihndi cjua vihi xi cjuahatsja ángel rë yungun ngajan nandya Tiatira. Cuitjin fi cjua: “Vihi cjua rë Quihndi rë Nina Jain, me vëhë ne, tuxcun me, sacuaha ndihi tsejen, hane ntsacu me sacuaha quicha sine xi catsicjë ndihi xutsë rë: ¹⁹Ha machaya ná tsëhë xa sacuaha cjuandaja xi nihñu, sacuaha cjuahmutacun nuju, cojo xi mangutacún, hvë xa xi tinihñu cojo sa xi ndaja cjuecani nuju. Cjuandaja xi nihñu quihndë ne, quisun sa xi cuma rë xi canihñu ntsacu cavetsihin. ²⁰Peru cojo yëjë sa ne, tjin ná vihi condra nuju ta, nijyuntacún tsëhë na chjuun Jezabel vë, na xi chja suva na xi profeta má na. Na vëhë ne, cojo cjuachacun rë na ne, tsinguetsun na hacuaha tsitsehen na xuta ladu naha cojo sa xi sahmi me cjuatsehen ngajñi xicjin ni me, hacuaha sinë me yojo rë chu xi cahme sacuaha ngu cjuatjo rë nina ndyojo. ²¹Na vëhë ne, casuá ran cahndé xi tsindeya na cjuatacun ran, peru mijí choho cuma ran tsëhë xcusun tsehen rë xi sahmi na cojo xicjin na. ²²Vëhë xi tsijaña rë na xcun ngu cahndé tsëhë cjuahmu, hane me xi sahmi cjuatsehen cojo na ne, suá rë me ngu cjuañihi jyë, sa tsajin choho cuma rë me hane cuindeyaain cjuatacun rë me tsëhë xcusun chocun rë na xi catsitsehen rë me xi casahmi me cjuatsehen jan. ²³Hane me xi má sacuaha quihndi tjë rë na ne, cjué tsiquéhen me, cojo sa xi cuatjin ne, cumachaya rë yëjë

sa xuta yungun naha xi ngahan ne, ndaja tsichúva cjuatacun cojo xahasen nuju, hane suá nuju jima ngu yun tucu satè nuju tsèhè xcusun xi canihñu. ²⁴Peru yahnga ngayun xuta Tiatira xi hacuiin cojo ngayun cachjuhunntsun cjuachacun jan ne, ngayun hyuun mé xi vijne cjua xi cahntsua nungun tsèhè Satanás. Ngayun ne, ndastu mé sa cuichjá xi nihñu ta, ²⁵xi sahmi ngujoyè ne, xi cuangunndujun tuhunhñu mé xi tjin nuju tsèhè Nina hisca hya xi nduvá ngahan. ²⁶Yo xi scaa rè xi cjue xcun, hacuaha sahmi chihin me cjuandaja naha hisca xi cuijnetaha ne, suá rè me ngahñu xi sahmi me gobiernu rè nanguicjín. ²⁷Hane me vèhè ne, cuitexa rè me xuta nanguicjín jan cojo ngahñu xi tjin rè me, sacuaha cojo ngu cuarta xi camá tsèhè quicha, hane sacuaha cuma xuva rè ngu tiji xi nihndè camá ne, cuatjin cumá cojo xuta cjín jan. Sacuaha ngahan ne, cafahántsa xa jan tsèhè nahmi naha, cuanitjin suáxa rè me xi sahmi me gobiernu. ²⁸Hane suá rè me hasen rè niñú seti xi vetjucaa nguitajñu. ²⁹Yo ngayun xi tjin nuju cjuasua xi cuinuhyun cjua xi chja Hasen rè Nina cojo yungun jan ne, ndaja tetuhuncun.”

Cjua xi cjuahatsja yungun ngajan Sardis

3 'Cjua vihi nihindi cojo sa xi cjuahatsja ángel tsèhè yungun ngajan nandya Sardis. Cuitjin fi cjua: “Cjua vihi xi cachja me xi tsuvangui rè yatu hasen rè Nina cojo yatu niñú: Hvè xa nuju. Tjin cjua nuju xi quicun yun, peru

quixiin ta hvè ta cahme yun.

²iCatasca nuju! Mé tsujun xi siu quicun handasa ndiya cueya ne, tuhun rè ngahñu ta, xi má rè Nina naha ne, xa xi nihñu ne, hacuiin tsejen sacuaha xi ha camá chihin xa jan. ³Tetuhuncun nguyèjè ni cjua xi ha cachjuhunntsun tsèhè Nina, tangunndujun cojo, hane nindeyun xcusun nuju. Cuatjin nihñu ta, sa xi cuascaain rè cjuatacun nuju ne, sehe cjué tjèngè nuju sacuaha cjue tjengui rè xuta ngu cha chéjè, ta hyuun hora xi cuinduva tjèngè nuju. ⁴Peru cojo yèjè sa ne, tjin ngajñi nuju ngu jo xuta ngajan Sardis xi cjèè tsinguetsun me tsjian rè me cojo cjuatsehen. Me xi cuacun vè ne, cojo ná tsujyihya me; hane cojo ngahan ne, cuaja me tsjian tyava tyjahi, tsèhè xi cuatjin ndatjin vechu chuva rè xi casahmi me. ⁵Me xi scaa rè cjue xcun ne, cojo me nicaja rè me tsjian tyava, sacuaha me xi cuacun vè. Hacuaha tsajin nixtin xi scujñu ñihi rè me tsèhè libru xi yaha ñihi rè xuta xi sacu rè cjuahñu ta, hisca cueyanangè ñihi rè me xcun Nahmi naha cojo xcun ángel rè me. ⁶Yo ngayun xi tjin nuju cjuasua xi cuinuhyun cjua xi chja Hasen rè Nina cojo yungun jan ne, ndaja tetuhuncun.”

Cjua xi cjuahatsja xuta rè yungun ngajan nandya Filadelfia

⁷Cjua vihi nihindi cojo sa xi cjuahatsja ángel tsèhè yungun ngajan nandya Filadelfia. Cuitjin fi cjua: “Cjua vihi ne, cjua rè me xi ndastu mé cjuatsehen tjin rè, hacuaha quixi me. Me vèhè ne, tacuntsja me llavi xi casatè

rë nima David, me xi cavitexa. Hane cahndé xi vuxaha me jan ne, tsajin yo xi cuma cuechja. Hane sa xi vechja me ne, tsajin yo cuma scuxaha.”⁸ Cuatjin fi cjua: “Hvë xa nuju. Casuá nuju cahndé xi tixaha tingotjo xi cumá nuju, hane tsajin yo cuma cuechja xi cumá nuju. Hacuaha hvë ta, chuva má ngahñu nuju, peru handasa cuatjin ne, cavetjun cjua naha hacuaha cjëë cjuahmu ñihi naha.”⁹ Tuhun cjuasua ta, chutsujun mé cumá rë xuta jan xi vihndé me tsëhë Satanás. Xuta jan ne, chja me xi tjë rë Israel má me, peru hacuiin xuta naha me ta, xuta ndacha me. Sahme xi xuta jan ne, cuinduva me cuiticjaxcun me ntsacun, hane scuëë me ta ngahan ne, meje ná ngayun.”¹⁰ Cavetjun cjuajeya xahasen nuju sacuaha xi ngahan catsingácun nuju. Ngatsë rë vëhë ne, ngahan ne, hacuaha cuetjo nuju cojo sa xi satiin nuju cjuacjintacun tsëhë hora xi chjahachuva rë xuta. Hora vëhë ne, ha tacun xati xi nduva xcun jingujyë ni ngasunhndé, hane hya chjahachuva rë jinguyëjë ni me.”¹¹ Ngutjen ni cjuëhë. Tangunndujun cojo cjua xi ha camachaya nuju tsëhë, cojo sa xi tsajin yo cjue cojo corona xi satë nuju.”¹² Yo xi scaa rë cjue xcun tsëhë cjuatsehen, ngahan ne, sahme xi cumá me sacuaha xihndé xi secun vasencja rë yungun xi vaniji hai rë yungun rë Nina. Hane quihndé cuetjuxiin me. Setaha rë me ñihi rë Nina naha cojo ñihi rë nandya rë Nina, Jerusalén xatsë. Nandya jan ne, sahmi Nina xi nduvajne tsëhë ngahnga. Hacuaha hisca setaha rë me ñihi xatsë naha.

¹³Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhuncun.”

Cjua xi cjuahatsja yungun ngajan Laodicea

¹⁴Cjua vihi nihndi cojo sa xi cjuahatsja ángel tsëhë yungun ngajan nandya Laodicea: “Cjua vihi ne, cjua rë me xi cjuaquixindaja, cjua xi chja me ne, quixi hacuaha cuatjin jain. Ngatsë rë me vë jan ne, cavetjuca yëjë xi casahmi Nina. Cuitjin fi cjua jan: ¹⁵Ndaja machaya ná hacutjin nihñu xa nuju. Hacuiin jemu ndaja peru hacuaha hacuiin jemu chojyihí, tu vasentjin siu. Xi má ná ne, hitsë sa ndaja sa xi hatuxa ndaja o sa xi hatuxa chojyihí.”¹⁶ Ngayun ne, ha maji sa tu ngu tsë vë ngayun, peru ngayun ne, jemu va xcusun nuju, vëhë xi cuaxëxin nuju sacuaha xi cuëhë natya cojo ntsuva.”¹⁷ Vihi cjua xi nújun: Ngayin ne, nchina ngayin. Jercu cavetjin tujún hane tsajin mé machaja niji. Cuatjin nújun. Peru machayiin nuju tsëhë cjuaquixi ta, xi quixi ne, jemu chojyihí tsujun, cojo cjuatsehen nuju, yuma yun, rcá yun, hane hacuaha quixti ngayun.”¹⁸ Vinchajyé nuju xi chuhun tsahan. Tjin ná oro ndaja xi catsicjë ndihi xutsë rë, hane cojo vëhë cuma nchina jain yun. Tjin ná tsjian tyava xi cuma chujun cojo sa xi hacuiin tu yo ni scuëë cjuasava nuju xi quixti ngayun. Hacuaha tjin ná rqui xi cuincha tuxcun, hane cumatsejen jain nuju.”¹⁹ Tichjátaha nuju ta, hya xi tjin yo me xi ngahan meje ná me ne, chjátaha rë me

hacuaha vicuya rë me. Tsëhë vëhë ne, catamachinitacun hane choho catama nuju, nindeyun xcusun nuju. ²⁰Nguehe tejña xi tichjá cojo nuju. Tu yo ni xi cuihndë xta naha ne, sehe sua cahndé ne, ngahan ne, cuisehen ngajan, hacuaha sinë niñu cojo me, hane me vëhë ne, sinë me cojo ná ngahan. ²¹Yo ngayun xi scaa nuju cuangun xcun tsëhë cjuatsehen, suá nuju cahndé xi cuinechun cojo ná cahndé hñu naha. Cuatjin cumá cojo nuju tangun ni sacuaha xi ngahan ta, hacuaha cacaa ná cëjë xcun, hane tejña cojo Nahmi naha cahndé hñu rë me. ²²Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun.”

**Cavëë Juan cahndé rcun
ngajan ngahnga**

4 Hya xi cavatju vihi ne, cahvë xi ngajan ngahnga ne, tsejen ngu tingotjo xi tixaha. Hane xta rë me xi cahndë xi cachja cojo ná titjun jan xi nuhya rë sacuaha nuhya rë ngu tyjo, xta vëhë cachja cojo ná cuitjin:

—Ndoveniiji guehehe sehe tsingácun ri xcusun xi sehe cumá.

²Hora vëhë ne, catsuva ná ngahñu rë Hasen rë Nina, ngajan cahvë xi ngajan ngahnga ne, tacun ngu cahndé rcun cojo ngu me xi tacun xcun. ³Hane me xi tacun xcun jan ne, xcusun rë me ne, seti tsejen sacuaha ndyojo seti xi hmí rë jaspe o cornalina. Hane ngu yejña sacuaha ndyojo seti xi hmí rë esmeralda, vëhë vindee rë cahndé rcun jan. ⁴Tahndee rë cahndé rcun

jan ne, siu sa can ñuju cahndé rcun, hane xcun jan ne, siu can ñuju xuta changá. Me vëhë ne, yaja me tsjian tyava hacuaha hinchasun rcu me corona tsëhë oro. ⁵Tsëhë cahndé rcun jan ne, vatë ndihichuhún hacuaha tsingá chuhun. Hacuaha xcun cahndé rcun jan ne, ti ndihi rë yatu lámpara xi hacui yatu Hasen rë Nina. ⁶Hacuaha nangui xcun cahndé rcun jan ne, tsejen sacuaha ngu ndachacun tsëhë vidriu xi hasen sacuaha hasen ndyojo tsin. Hane tsëhë tahndee rë cahndé rcun jan ne, chuva ngu yuju rë, siu ñuju xcusun xi quicun. Hane xcusun jan ne, yaja tuxcun jingujyë yojo rë, sa taha xcun, sa taha ngaxtun. ⁷Ngu xi quicun jan ne, xcusun rë ne, sacuaha chu xa tsejen. Xi majo ne, sacuaha ndyaja, hane xi má jyan ne, sacuaha xcun xuta jyihi xcun. Xi má ñuju ne, sacuaha ngu chu jya xi tivitjen chu, cuatjin tsejen. ⁸Jima ngu xi quicun jan ne, tjin jyun tyjunga rë. Hane jingujyë ni tsëhë yaja tuxcun, taha xcun cojo taha ngaxtun. Hane xi quicun jan ne, sa nixtin, sa nixten, sejiyin ta, chja cuitjin:

Tyjahi, tyjahi, tyjahi
camahani Nina xi jemu hñu
cjua.

Nina tacun me, cavejña me
hatsëë, hacuaha cuejña cuaha
me.

Cuitjin chja.

⁹Hane sahmi jyë hnga ñihi rë Nina hacuaha sua nacuechji rëhë hacuaha vaxëndaja rë Nina xi tacun xcun cahndé rcun jan, Nina xi tacun cuaha me yëjë nu, yëjë nixtin. Hane jimangu ndiya xi vaxëndaja

rë Nina ne, hora hya ne, ¹⁰can ñuju xuta changá xi siu jan, viticjacun me xcun me xi tacun cahndé rcun jan, hane faharcun me me xi tacun nu cjuí nu nduva. Hacuaha xuta changá jan ne, candisun me corona rë me xcun cahndé rcun jan, sehe chja me cuitjin:

¹¹Ngayun Nai niji, ngayun Nina niji,
vechu chuva rë xi cuma jyë
cuma hnga yun hacuaha sacu
nuju ngahñu cjuá.
Ngayun canihñu yëjë ni xcusun,
hane ngatsë rë cjuandaja nuju
siu yëjë ni hacuaha camá yëjë
ni.

Xtë xujun cojo yatu sellu

5 Sehe cahvë xi tsja ladu quixi me xi tacun xcun cahndé rcun jan, yaha me ngu xtë xujun xi camahindu xcun cojo ngaxtun, hacuaha xujun jan ne, tine rë yatu sellu. ²Hane hya ne, cahvë ngu ángel xi jemu hñu cjuá, hane titsiquindë cojo yëjë ni ngahñu rë cjuá vihi:
—¿Yo ngayun xi vechu chuva rë xi cuicheyun sellu rë sehe nixingun xtë xujun vihi?

³Hya xi camá ne, ndastu yo, sa xi siu ngahnga, sa xi siu nangui, o sa xi siu ngahma nangui, ndastu yo cavetjucacun xi tsixinga xtë rë xujun jan, o sa xi scutsejen mé xi chja. ⁴Hane ngahan ne, cajíhnda nguñajacácun, tsëhë xi casacuiin yo xi cuechu chuva rë xi tsixinga xtë rë xujun jan, sehe scutsejen mé xi chja. ⁵Ngajan xi ngu xuta changá jan ne, cachja me cojo ná cuitjin:

—iXi cachjihndiin sa! Chutsijin ta, me xi hmí rë Chu Xa tsëhë tjë

rë cha Judá ne, me xi cavetjusehen tsëhë David xi cavitexa hatsëë ne, me vëhë cacaa rë me quiji me xcun. Hane me vëhë cuma tsixinga me xtë rë xujun cojo yatu sellu rë.

Cristu, ta xuta matitjun má me, cafaha me xtë xujun

⁶Xi cavutsejen, ngajan secun vasencja rë cahndé rcun jan cojo tahndee rë, ngajñi rë ñuju xi quicun jan cojo xuta changá jan, ngajan secunhñu ngu xihin sacuaha Chu Tsánga, xi tsejen sacuaha ngu chu xi cahme. Me xi sacuaha tsánga jan ne, tjín yatu ndyaja rë cojo yatu tuxcun xi hacui yatu hasen rë Nina xi visehen jingujyë ni ngasunhndë. ⁷Hane me xi sacuaha tsánga jan ne, canduva me cafaha me xtë rë xujun tsëhë tsja quixi me xi tacun xcun cahndé rcun jan.

Xuta changá ne, faharcun me Jesucristu

⁸Hane hora xi cafahatsja me xtë rë xujun jan ne, catsiñuju xcusun xi quicun jan cojo can ñuju xuta changá jan ne, caticjacun me xcun Tsánga jan. Jimangu me ne, yaha me ngu arpa hacuaha jimangu me hinchangui tsja me tyucu ndixuhi tsëhë oro xi quitsë rë cojo tyjungunsa. Hane tyjungunsa jan ne, hacui oración rë me xi nguñajacacun macjain rë me. ⁹Hane me vëhë ne, tisë me ngu sun xatsë xi cuitjin fi cjuá rë:

Vechu chuva rë xi chjuhun xtë
rë xujun vë, hane nuxuhun
sellu rë;
tsëhë xi catsiquehen me yun,
hane cojo jni nuju xi cavanga ne,
cachuhun xi cumá rë Nina

xuta tsëhë yëjë ni tjë, yëjë ni hne, yëjë ni nandya, cojo yëjë nación.

¹⁰Hacuaha ngayun ne, canihñu xi xuta jan ne, cumá me xuta xi vitexa me, hacuaha cumá me sacuaha nahmi xi cjuahancuenda rë Nina xi faharcun me, hane cuitexa me nguehe xcun nanguí.

Cjín ángel ne, faharcun rë Jesucristu

¹¹Sehe cavutsejen jemu cjín camahani ángel xi cavindee rë cahndé hñu hiscan siu xcusun xi quicun jan cojo xuta changá jan. Hane tjín xqui sacuaha tsëhë të mil ndiya xi të mil. Hacuaha cahndé xta rë ángel cjín jan ¹²cachja hñu cuitjin:

Me xi má Tsánga xi catsiquehen xuta me ne, vechu chuva rë xi cjuahatsja me ngahñu xi cuitexa me, cojo cjuanchina, cojo cjuahasen, hacuaha hñu cumá cjuá rë me, tjín rë me cjuandaja rë xuta, cuma jyë hnga me hane yëjë ni me ne, tsinchacuntihin rë me.

Yëjë ngarca ni ne, faharcun rë Jesucristu

¹³Sehe cahndé xi nguyëjë ni xi siu ngahnga cojo nguyëjë ni xi siu ngasunhdé cojo nguyëjë ni xi siu nguihma nanguí cojo ngajñi ndachacun, yëjë ngarca xi cuacun vë ne, tichja cuitjin:

Cuitjin cumá tsëhë me xi tacun cahndé rcun hacuaha cumá tsëhë Tsánga jan:

iCatama tsëhë me xi tsinchacuntihin rë me, xi chjaharcun rë me, xi cuma jyë hnga me, xi tjín rë me ngahñu!

iCuatjin catama me tsëhë me nu cjui nu nduva!

¹⁴Hane catsiñuju xcusun xi quicun jan ne, cachja cuitjin:

—iCuatjin jain!

Hane xuta changá jan ne, caticjaxcun me sehe cafaharcun rë me.

Sellu tjún

6 Cavutsejen ngahan hya xi Tsánga jan ne, cavuxaha me ngu sellu tsëhë yatu sellu jan. Hane tsëhë catsiñuju xcusun xi quicun jan ne, cahndé ngu xta xi nuhya rë sacuaha xi faneya. Cuitjin cachja: —iNdove!

²Hane cavutsejen xi cavetjutsejen ngu naxin tyava. Hane me xi quisun rë chu jan ne, yaha me ngu yanchijnu, sehe casacu rë me ngu corona hane cavetju me sacuaha ngu cha xi cjue sahmi si xi tjín ngucacun cha xi scaa rë cha xi cjue cha xcun.

Sellu xi majo

³Hane hya xi cavuxaha Tsánga jan sellu xi majo ne, cahndé ta, xcusun xi majo xi quicun jan ne, cajindaya cuitjin: —iNdove!

⁴Ngajan cavetjutsejen ngu nga naxin xi hani hñu xcusun ru. Hane me xi quisun rë chu vë ne, ngu me xi casatë xa rë xi cjuahaxin me cjuajeya xi tjín nanguí, cojo sa xi xuta ne, tsiquehen xicjin me ngajñi

rë me. Hane suva me vëhë ne, cafahatsja me ngu quicha jyë.

Sellu xi majyan

⁵Hya xi cavuxaha me sellu xi majyan ne, cahndë xcusun xi quicun xi majyan jan, hane cuitjin cachja:

—iNdove!

Hane cavutsejen xi cavetjutsejen ngu naxin jma. Hane me xi quisun rë chu vë ne, yahatsja me ngu nisu chuva. ⁶Sehe cahndë sacuaha ngu xta xi vetju tsëhë ngajni rë catsiñuju xcusun xi quicun jan xi cachja cuitjin:

—Ngu ni kilu trigu sacu chjí rë mosu, o sa jyan kilu ni cebada sacu rë me; peru aceite cojo xan rë uva ne, cumachajiin.

Sellu xi má ñuju

⁷Hane xi cavuxaha me sellu xi má nuju ne, cahndë xcusun xi quicun xi má nuju jan, hane cuitjin cachja:

—iNdove!

⁸Hane cavutsejen xi cavetjutsejen ngu naxin xi jemu va jyihi. Hane me xi quisun rë chu jan ne, Cjuaveya hmí rë me, hane tjengui tiña rë me, me xi hmí rë Hades, cahndé hiscan xi má hasen rë nima castigu. Hane me vëhë jan ne, tjin rë me cahndé xi tsëhë ngu tsëhë ñuju rquí xuta ngasunhdë xi cuma tsiquehen me ngu rquí vë cojo espada o cojo jindya o cojo chíhin o sa xi cojo chu cjan rë xi tjin xcun nangui.

Sellu xi má hñu

⁹Hya xi catuxaha sellu xi má hñu ne, ngajan ngahma rë ngasunscun

ne, cahvë hasen rë nima xi catsiquehen xuta ngatsë rë xi camaçain rë me cjuarë Nina cojo ngatsë rë cjuaquixi rë me xi casua me. ¹⁰Me vëhë ne, cajindaya me cachja me cuitjin:

—Ngayun Nai rë yëjë ni, jemu tyjahi yun, quixi cjuarë nuju.

¿Janihya nihñu cuendun jyë rë xuta xi siu me xcun nangui, hane nihñu ngojo jni niji? —Cuatjin cachja me.

¹¹Ngajan xi cafahatsja me jimangu me ngu tsjian tyava, hane cafaha me cjuarë cueñajyu me ngu jo nixtin sa. Vindeya sa rë hisca hya xi cumachihin xqui rë xuta ladu rë me cojo me xi hacuaha tangun cueya sahmi xuta sacuaha cavatju me suva me.

Sellu xi má jyun

¹²Hacuaha cavutsejen hya xi cavuxaha me sellu xi má jyun. Hya ne, jercu cjuachan cafani nangui. Tshui ne, camá jma. Jemu va jyihi camá, sacuaha ngu tsjian jma. Hane sá xatsë ne, camá hani sacuaha jni. ¹³Hane niñú tsëhë ngahnga ne, cavixu xcun nangui sacuaha vixu tu rë ya higo hya xi vanga tjo hñu. ¹⁴Ngahnga ne, cafëya sacuaha ngu xujun të xi catsijeyu, hane hisca tjin ngu naxi o ngu nangui xi hincha vasencja rë ndachacun ne, catjune rë cahndé rë. ¹⁵Ngajan xi xuta xi vitexa me ngu nangui, cojo yahnga me xi cojo me vitexa me, cojo xuta nchina, cojo sindadu capitán, cojo xuta xi hñu cjuarë, cojo yëjë sa xuta, sa xuta xi caxteña o sa xuta xi ndaya tjin, nguyëjë ni me quiji cavangahma me cahntsua nguijo cojo ngajni naxindya rë ngujiña cha.

¹⁶Sehe cafehyataha rè me nguiñã cojo naxindya jan cuitjin:

—iCatixusun niji cojo sa xi tinchunhmu niji! Cuatjin cuma cuinechinmi tsèhè xcun me xi tacun cahndé rcun hane satiin niji cjuaxti rè Tsánga jan.

¹⁷Cuatjin cumá ta cavechu nixtin xi jercu choho cumá ngatsè rè cjuaxti rè me, hane íhá tjin yo scaa rè cojo?

Xuta xi macjain rè Nina

7 Xi cavutsejen vihi ne, cahvè ñuju ángel xi hinchacun quixi catsiñuju yuju rè ngasunhdë. Hane ángel jan ne, casuaain cahndé xi cuanga catsiñuju tjo xi vanga ngasunhdë ta, hisca xi ngu tjo ne, cuangaain xcun nangui, o xcun ndachacun, o hisca rcu ngu ya. ²Sehe cahvè ngu ángel xi hacjahi. Hane camiji ángel jan hiscan xi vetjucaa tsuhi, hacuaha yaha ángel sellu rè Nina quicun. Hane cajindayahñu ángel jan cojo catsiñuju vë ta tacuntsja ángel vë xi choho sahmi cojo nangui cojo ndachacun. ³Cuitjin cachja me cojo: —Ndastu mé dañu nihñu cojo nangui, cojo ndachacun, cojo ya. Ndastu mé nihñu hisca xi cajnetaha cavetaha sellu xten xuta xi cavatsë Nina naja.

⁴Ngajan xi cahndë xi cachja me xqui rè me xi casetaha rè chuva cojo sellu jan: ngu cientu cojo yachan ñuju mil má me tsèhè yëjë xuta tjë rè Israel. ⁵Tsèhè xuta tjë rè Judá ne, tejó mil má me xi yaha sellu; hacuaha tejó mil má me tsèhè xuta tjë rè Rubén, tejó mil tsèhè xuta tjë rè Gad. ⁶Tejó mil má me

tsèhè xuta tjë rè Aser, tejó mil tsèhè xuta tjë rè Neftalí, hacuaha tejó mil tsèhè xuta tjë rè Manasés. ⁷Tsèhè xuta tjë rè Simeón ne, tejó mil má me xi yaha sellu; hacuaha tejó mil má me tsèhè xuta tjë rè Leví, tejó mil tsèhè xuta tjë rè Isacar. ⁸Tsèhè xuta tjë rè Zebulón ne, tejó mil má me xi yaha sellu; hacuaha tejó mil má me tsèhè xuta tjë rè José, tejó mil tsèhè xuta tjë rè Benjamín.

Xutaxín xi hacuaha camacjain rè me

⁹Xi cavatju xcusun vihi ne, cavutsejen, hane cahvè xutacjín. Hisca tsajin yo cuma cuexqui rè me. Canduva me tsèhè ngajñi rè jimangu nación, jimangu tjë rè xuta, jimangu nandya cojo jimangu hne. Hane cafehe me hinchacun me xcun cahndé rcun cojo xcun Tsánga jan. Yaja me tsjian tyava hacuaha yahatsja me jne. ¹⁰Hane jindaya me cojo ngu xta hñu, tichja me cuitjin:

Xi cavetjuntjen ne, camá ngatsë rè Nina naja

xi tacun me cahndé rcun cojo ngatsë rè Tsánga jan.

Cuatjin cachja me. ¹¹Ngajan xi yëjë ni ángel ne, hinchacun quixi tahndee rè cahndé rcun jan hacuaha cavindee rè xuta changá jan cojo catsiñuju xcusun xi quicun jan. Hane caticjaxcun ángel xcun cahndé rcun hane cafaharcun rè Nina, ¹²tichja cuitjin:

iCuitjin jain!

Nina ne, yëjë ni tsinchacuntihin me. Jyë hnga me.

Tjin rè me cjuahasen. Taan nacuechji rè me.

Xuta ne, vaxëndaja me. Vechu chuva rè xi cjuahatsja

me ngahñu xi cuitexa me.

Hacuaha hñu cjuá rë me.

Cuanitjin cjue me yëjë nu yëjë nixtin.

iCuatjin jain!

¹³Hya xi camá ne, ngu xuta changá jan, cafinenguise me ngahan cuitjin:

—Me xi cuicun xi yaja tsjian tyava ne, ¿yo má me? hane ¿hisca jani canduva me?

¹⁴Ngajan xi cafayanguë cuitjin:

—Tatá, xcusun vëhë ne, ngayun hyun, hacuiin ngahan.

Sehe cachja me cojo ná cuitjin:

—Me vihi cacaa rë me cjuañihi cjuacjintacun jyë. Cavane me tsjian rë me, camá tyava cojo jni rë Tsánga. ¹⁵Vëhë xi tjin rë me cahndé xcun cahndé rcun rë Nina, hane fahacuenda me nixtin nixten cahntsua yungun rë me. Hane Nina xi tacun xcun cahndé rcun ne, ngu tangun ni cuejnándaja me cojo xuta jan. ¹⁶Hindë tsajin nu tsajin nixtin cuma vojo rë me. Cuma xindaain rë me, cuacaain rë me tsuhi; hacuaha tsijendaain rë me cojo hnde rë, ¹⁷ta cahndé rë vëhë ne, Tsánga xi tacun cavasencja rë cahndé rcun ne, cuahacuenda rë me, hane cuincha ndiya rë me xcun nandá xi sua cjuahñu. Hane Nina ne, tsixiya me yëjë ndatuxcun xuta jan.

Sellu xi má yatu

8 Hane xi cavuxaha me xi sacuaha Tsánga jan sellu xi má yatu ne, ngahnga ne, cavejña jyu camahani sacuaha chuva rë vasen hora. ²Cuatjin camá. Sehe cahvë xi yatu ángel vë xi siucahndë xcun Nina ne, cafhahatsja yatu

tyjo. ³Sehe canduva sa ngu ángel xi yaha ngu tyucu ndixuhi tséhë oro, hane casecunquixi cojo tiña ngasunscun. Ngajan cafhahatsja me cjin tyjungunsa cojo sa xi cuaca me xcun ngasunscun tséhë oro jan xi tacun xcun Nina. Hane hnde rë ne, camatangun cojo oración rë yëjë me xi tyjahi cjuatacun rë me cojo sa xi cuma chihin cjuá. ⁴Hane nihndi rë tyjungunsa xi yahatsja ángel jan ne, casecjan cojo oración rë me xi tyjahi cjuatacun rë me, hane camiji tangun hiscan tacun Nina. ⁵Ngajan xi ángel jan ne, cafaha tyucu ndixuhi jan, catsinguitsë rë cojo ndihi tséhë ngasunscun jan hane catsingatjen rë xcun ngasunhndë. Hane hora vëhë cafaneya cjuachan cavatë hacuaha cafani nangui.

Yatu tyjo xi tsijane ángel

⁶Hya xi camá ne, yatu ángel xi yaha yatu tyjo jan ne, caviyujucacun xi tsijane tyjo rë. ⁷Ángel xi tjun jan ne, catsijane tyjo rë. Hane jercu cavaha tsi ndyojo xcun nangui. Hacuaha cavixu ndihi xi tecjan cojo jni. Cojo vëhë ne, tséhë yëjë ni ya xi tjin ne, tséhë chuva jyan ne, ngu cati. Hisca cojo jingujyë nguijña xi xcuen ne, café cati.

⁸Sehe catsijane ángel xi majo jan tyjo rë. Hane hora vëhë ne, camatsejen sacuaha ngu nguijñacha jyë xi yaha rë ndihi xi cjanenguiya ngajñi ndachacun. Hane tséhë yëjë ndachacun ne, tséhë chuva jyan cahndé, ngu ni cavuya jni. ⁹Ngajan xi tséhë yëjë chu xi hincha nandá jan, tséhë chuva jyan chu ne, ngu chu cahme chu; hacuaha tséhë

chuva jyan barcu xi hinchasun ne, ngu cafè cati.

¹⁰Sehe catsijane ángel xi majyan jan tyjo rë. Hane hora vèhè ne, canenguiya tsèhè ngahnga ngu niñú jyë xi jercu ndaja seti sacuahá seti ngu ndihi jyë. Hane niñú jan ne, casatè rë ndajyë cojo hiscan vetju nandá. Hane tsèhè yëjë nandan jan ne, ngu tsèhè chuva jyan cahndé casatè rë. ¹¹Niñú jan ne, yaha ñihi rë xca sa xi hmí rë Ajenjo, ta cavuya sa nandá hiscan cjanenguiya niñú. Hane jemu cjin xuta cahme me xi cahvi me nandá sa jan.

¹²Sehe catsijane ángel xi ma ñuju tyjo rë, hane choho casahmi cojo tsuhi cojo sá ta jemu camachuva hasen rë. Hacuaha chuva rë jyan niñú ne, ngu ni cafè ngahñu rë cahvo. Ngajan xi tsèhè ngu cuaha nixtin o tsèhè ngu cuaha nixten ne, ngu tsèhè chuva jyan cahndé ne, camajñu hane casacuiin hasen rë.

¹³Hya xi camá ne, ngajan vasencja rë ngahnga tivitjen ngu chu jya. Hane cuitjin sahmi sen chu cajindaya chu cojo ngu xta hñu:

—Cojo cjuatsehen nuju, ngayun xuta xi nechun ngasunhdé ta, tsèhè xi vangui sa jyan sa ángel xi chaja sa tsijane tyjo rë.

9 Hya xi camá ne, catsijane ángel xi má hñu jan tyjo xi yaha, hane cahvè ngu niñú xi cjanengui tsèhè ngahnga xcun nangui. Hane cafahatsja niñú jan llavi tsèhè ngojo rë nduchin. ²Sehe cavuxaha nduchin ne, hane jemu camiji nihndi rë sacuahá nihndi rë ngu hornu jyë. Hisca tsuhi cojo jingujyë ni tjo ne, tsejen jñu ngatsë

rë nihndi xi vetju tsèhè nduchin jan. ³Hane tsèhè ngajñi rë nihndi jan ne, cavixu chu nchahva xcun nangui. Hane chu jan ne, tsavi cojo chu sacuahá tsavi cojo chu naya xi siu ngasunhdé. ⁴Hane cafaha chu cjuá xi tsajin mé sahmi chu cojo nguijña o cojo xca o sa cojo ya ta, suva xi satè chu xuta xi siutaain xten me sellu rë Nina. ⁵Casacuiin rë chu cahndé xi tsiquehen chu xuta jan ta, cuenda jemu cuiyujhmu me cahntsua hñu sa. Hane cjuahmu xi cuiyuju me cojo ne, jineya sacuahá jineya hiscan cjuahá chu naya.

⁶Nixtin hya ne, xuta jan ne, tsimeje me cjuaveya, peru sacuiin cjuaveya xi cuma rë me. Xuta jan ne, cjuehyacacun me cjuaveya, peru sacuiin.

⁷Chu nchahva jan ne, tjin chjine chu sacuahá naxin xi tjin chjine chu xi cjue chu si. Hinchasun rcu chu ngu xcusun sacuahá ngu corona tsèhè oro, hane xcun chu ne, tsejen sacuahá xcusun rë xcun xuta. ⁸Tsa rë chu ne, sacuahá tsarcu yachjin, hane nehñu chu ne, sacuahá nehñu xa cjan rë. ⁹Tixtè cun ru cojo ngu xcusun sacuahá chinga quicha, hane xi nuhya rë xi fane tyjunga ru ne, hñu nuhya rë sacuahá cjin camahani carreta xi tijuvé naxin xi cuetsihin si. ¹⁰Ndetsihin chu yaha quicha rë chu naya. Hane cojo quicha jan ne, tjin ru cahndé xi sua chu cjuañihi xuta xcun xi hñu sa jan. ¹¹Hane sacuahá rey rë chu ne, má ángel rë nduchin jan. Ángel jan ne, Abedón hmí rë sa xi hne hebreo o Apollyon sa xi hne griego. Catsijo cjuá vè ne, vijne Ngu xi Tsiqueya rë.

¹²Vèhè má cjuañihi xi tjun cuma. Jo sa má xi ha meje cuatju.

¹³Hya xi camá ne, catsijane ángel xi má jyun tyjo rë. Ngajan xi canuhya rë ngu xta xi cavetju tséhë tjeheh rë ngasunscun xi tacun xcun Nina, hiscan xi jyihi sacuaha ndyaja ru. ¹⁴Xta jan ne, cachja cojo ángel xi má jyun xi catsijane tyjo jan. Cuitjin cachja:

—Nismi catsiñuju ángel xi tjihñu tjeheh rë ndajyë jyë xi hmí rë Eufrates.

¹⁵Hane camandaya catsiñuju ángel jan. Ángel jan ne, caviyujuya hisca xi cuechu nu, cuechu sa, hane cuechu nixtin xi cuma meje rë xi tsiquehen rë xuta. Chuva jyan chuva jyan xuta ne, ngu ngu me cueya me. ¹⁶Hane xqui rë sindadu xi vitexa ángel jan ne, jo cientu millón má xi hinchasun naxin. Hane ngahan suva cahndë xqui rë.

¹⁷Naxin cojo cha xi hinchasun rë chu xi cahvë ngajñi nijña naha ne, cuitjin cun. Cha xi hinchasun rë chu ne, yaja cha chinga quicha xcusun hani rë ndihi, xcusun rë susë hñu hacuaha xcusun sine. Hane rcu chu naxin jan ne, sacuaha rcu chu xa cjan rë cun. Hane tséhë hntsua chu ne, tivetju ndihi tivetju nihndi cojo azufre. ¹⁸Hane ngatsë rë jyan cjuañihi jan xi vetju tséhë hntsua chu matsejen ne, ngatsë rë ndihi, cojo nihndi cojo azufre ne, ngu cahndë tséhë chuva jyan cahndë xuta cahme me. ¹⁹Jemu tsavi cojo hntsua chu, peru hacuaha tsavi cojo ndetsihin chu. Ndetsihin chu ne, sacuaha chu yë cun ta, tjin rcu. Hane rcu vëhë ne, má sahmi chu dañu cojo.

²⁰Peru handasa cuatjin camá, xuta xi cacaa rë me ta cahmii me

cojo cjuacjintacun vëhë ne, tsajin camacjincacun me tséhë cjuatsehen xi casahmi me ta, cafaharcun cuaha me xitsehen cojo nina xi camá tséhë oro, tséhë plata, tséhë quicha sine, tséhë ndyojo, cojo tséhë ya. Cafaharcun cuaha me nina jan xi maji vutsejen, maji hndë, maji tsujyihya. ²¹Hacuaha tsajin camacjincacun me tséhë xi catsiquehen xicjin me, o tséhë xcusun xi sahmi me ngatsë rë xi ma rë me cjua surqui, o tséhë cjuatsehen xi sahmi ngajñi rë me sa chjuun cojo chjuun o sa xihin cojo xihin, o sa tséhë cjuachëjë rë me. Catsindeyaaïn me xcusun rë me.

Ángel xi yaha xtë lihndi xujun

10 Hya xi camá ne, ngajan cahvë ngu ángel xi hñu cjua, nduvajne tséhë ngahnga tixtëcun rë yuffí. Hacuaha ngu yejña cavindee rë rcu ángel jan. Xcun ne, seti sacuaha tsuhi; hane tyuhmi rë ne, tsejen sacuaha ngu ndihi hndë xi vitjen. ²Hane yahatsja ngu xtë lihndi xujun xi cavixinga. Hacuaha cavisane ntsacu quixi xcun ndachacun hane xi scun ne, xcun nangui quixí. ³Ángel jan ne, cajindaya cojo ngu xta hñu, hane nuhya rë sacuaha xi tsichan ngu chu xa. Hacuaha hora xi cajindaya ne, cachja xta rë yatu chuhun vatë. ⁴Hora xi cachja yatu chuhun jan ne, cavëjñacácun xi tsihindú cjua jan peru casahmee ta, cahndë ngu xta tséhë ngahnga xi cachja cojo ná cuitjin:

—Caveni nihindi cjua rë yatu chuhun vë ta, cuiyujuhma cjua vë.

⁵Hya xi camá ne, ángel xi cahvë xi secun xcun ndachacun cojo xcun

nangui quixí jan ne, catsiquijin tsja quixi ngahnga. ⁶Hane casua cjuaquixi rë hisca caveyanangui rë Nina xi tacun yëjë nu yëjë nixtin, me xi hacuaha catsicha rë ngahnga cojo yëjë ni xi tjin rë, cojo nangui cojo yëjë xi tjin rë, cojo ndachacun cojo yëjë xi tjin rë. Cuitjin cachja xi casua cjuaquixi rë:

—Vindeyaain sa rë ta, ⁷ha ndiya jiya nixtin xi suacuenda ángel xi má yatu. Hya tsijane tyjo rë ne, hane cumachihin cjua xi jiyahma rë Nina, cjua xi casua me camachaya rë profeta xi sahmi xa rë me.

⁸Hya xi camá ne, ngajan cahndé nga xta xi cachja tséhë ngahnga cojo ná cuitjin:

—Tihin chjehe xujun lihndi xi tjin tã jan tséhë tsja ángel xi secun xcun ndachacun cojo xcun nangui quixí.

—Cuatjin cachja xta cojo ná.

⁹Véhë xi cëjtëjngë ángel hane cafehya rë xi catisua ná xujun lihndi jan. Hane cachja cojo ná cuitjin:

—Juhun, chjehe xini cjua rë cojo sa xi titehercui. Cjua jan ne, sahmi sa rë cahntsue, peru ntsove ne, sahmi haxi rë.

¹⁰Sehe cafaha xujun lihndi jan tséhë tsja ángel, hane cajínë. Hane ntsuva ne, camá haxi rë sacuaha xi cajínë tsjen, peru xi cafë cajínë ne, cahntsua canangui naha ne, camahmu. ¹¹Sehe cavuya cachja nga cojo ná cuitjin:

—Tjin xi cuinoje ngu ndiya nga ngatsë rë Nina. Cuinoje tséhë xutacjín, xuta xi hacjahi hacjahi nación rë me, xuta xi hacjahi hne chja me, hacuaha cojo xuta xi hñu cjua me ngatsë rë xi vitexa me.

Jo testigu xi cahme ne, cavuya nga cjuahñu rë

11 Hya xi camá cajínë ne, casua ná ngu rquí ya naxu xi machjiréhë sacuaha ngu ya chuva. Sehe cachja ángel jan cojo ná cuitjin:

—Tihin chjehe chuva rë yungun xi matitjun rë Nina cojo tséhë ngasuncun. Hacuaha texqui me xi faharcun ngajan. ²Xi nichove yungun xi matitjun ne, hacuiin cojo cahndé xi má ndatsen rë nichove. Xi canichuviin vë. Cahndé vëhé ne, satëtsja xutaxín xi macjaain rë me Nina. Me xi cuacun vë ne, tsinguetsun rë vë, hacuaha tsinguetsun rë nandya rë Nina xcun xi yachan jo sá cojo xcusun tsehen xi cún me. ³Xcun nixtin vëhé ne, tsingátju jo testigu naha, hane me xi cuacun vë ne, cuichja me xcusun xi sehe cumá. Ngu mil cojo jo cientu cojo jyanchan nixtin jan ne, cuichja me cjua naha, hacuaha cuaja me tsjian rë cjuachoho.

⁴Jo me vëhé ne, hacui jo ya olivu xi tjin cjua tséhë, hacuaha hacui me xi jo candelero xi siu xcun Nina, me xi vitexa ngasunhndë. ⁵Sa tjin ngu xuta xi meje sahmi me dañu me ne, cuetju ndihi tséhë hntsua me hane tsicjëya rë xi chohovë rë me. Chuva vëhé cueya tu yo ni xi meje xi choho sahmi cojo rë me. ⁶Jo me vëhé ne, siutsja me ngahñu xi cuechja me ngahnga sehe cuaain tsi nixtin xi cuehya me. Hacuaha satë rë me ngahñu xi sahmi me xi nandá ne cuya jni o xi cuanguihmu rë me nangui cojo yëjë xcusun cjuacjintacun. Cuatjin cumá tu

cutjin cjin ndiya cuma meje sahmi me.

⁷Ndatjin, peru hya xi cafë casua me cjuaquixi rë me ne, ngu me sacua ha ngu chu chojyihi xi miji tsëhë nduchin ne, sahmi chu si cojo rë me, hane scaa ru cjue chu xcun hane tsiquehen chu me.

⁸Hane nima jan ne, hacuiin xinchaniji ta cuiyuju ndiyatë rë ciudad jyë. Ciudad jyë jan ne, sa xi chjahanchuvan ne, cuma cuinújan xi hmí rë Sodoma cojo Egipto.

Ngajan ni ne, cahme Nai naja xcun cru, hane ngajan cuiyuju nima.

⁹Xcun xi jyan nixtin vasen ne, jemu cjuehe xuta. Cjuehe me tsëhë yëjë ni nandya, tsëhë yëjë ni tjë, tsëhë yëjë ni hne cojo tsëhë yëjë ni nación. Cjuehe me scutsejen me nima, hane tsingatiin me xi xinchaniji nima.

¹⁰Hane xuta xi siu ngajan ne, jercu ndama rë me ngatsë rë cjuaveya jan. Hisca cuiyuju me suhi hane tsingatju me cuatjo ngajñi xicjin me. Cuatjin sahmi me ta tjin rë me cjuasua xi cafë jo profeta jan xi jercu casua me cjuañihi.

¹¹Peru xi cafë jyan nixtin vasen jan ne, xta xi sua Nina xi tsëhë cjuahñu ne, cavisehen nga rë nima. Hane caxinchacun quixi me. Ngajan xi ngu chircun jyë cavisehen rë xuta xi cavutsejen rë me. ¹²Hya xi camá ne, me xi cavuya xta rë ne, cahndë me ngu xta hñu xi cachja tsëhë ngahnga cuitjin:

—Nduvun nuju nguehe.

Ngajan xi quijiniji me ngahnga ngajñi ngu yufi. Hane cavëë xuta xi chohovëë rë me ta quijiniji me. ¹³Ha hora vëhë ni ne, jercu cjuachan cafani nangui hane tsëhë

chuva rë të rquí tsëhë ciudad jan ne, cavixujne ngu. Hane ngatsë rë me vëhë ne, yatu mil xuta cahme. Ngajan xi xuta xi cavangui me ne, jercu catsacjun me camá. Sehe casahmi jyë casahmi hnga me Nina xi tacun ngahnga.

¹⁴Cojo vëhë cajnetaha cjuacjintacun xi majo. Peru ha cjuehe xi ma jyan.

**Xcusun xi camá hya xi
cafane tyjo xi má yatu**

¹⁵Hya xi camá ne, catsijane ángel xi má yatu tyjo rë, sehe canuhya rë tsëhë ngahnga xta hñu xi cachja cuitjin:

Jingujyë rë nandya xi vitexa xuta ngasunhdë xi matitjun ne, cavisehen gobiernu rë Nina naja cojo Cristu, me xi catsingatju me.

Hane me vëhë sahmi me gobiernu yëjë nu yëjë nixtin.

¹⁶Ngajan xi catsiyëjë can ñuju xuta changá xi siu me xcun cahndë rcun rë me ngajan xcun Nina ne, caticjan xcun me, hane cafaharcun me Nina.

¹⁷Hane cuitjin cachja me:

Tihin nacuechji nuju, Tatá Nina. Ngayun jercu hñu camahani ngayun.

Hacuí ni yun hya, hacuí ni yun quihndë, hane hacuí ni yun yëjë nixtin.

Hindë ticujun ngahñu jyë nuju xi satë nuju hane ha tivetsuhun nihñu gobiernu.

¹⁸Xuta ne, choho hvë me yun, peru cavechu nixtin xi macjan nuju cojo cjuahngatacun rë me.

Cafehe hora xi nihñu cuendun tsêhê nima.

Tuhun chjí rê me xi casahmi xanuju sacuaaha profeta, sacuaaha xuta nuju, sacuaaha xutaxín xi faharcun me ñihi nuju.

Tuhun rê yêjê ni me, sa yehe sa langa me.

Hane me xi tsicjêya rê cojo xcusun rê ne, tuhun rê me xi cjueya me.

¹⁹Ngajan xi cachjahaxin rê tsjian rê tingotjo rê yungun rê Nina ngajan ngahnga, hane cahntsua yungun jan ne, camatsejen caxa ximinchacun xi yaha contrato xi casahmi Nina cojo xuta rê me. Cavatê ndihichuhún, cafaneya, catsinga chuhun, cafani nangui hacuaha cavaha ngu tsi ndyojo xi jercu hñu camahani. Cuatjin camá.

Scaanya yê xitsehen cojo quihndi xi catsingatju Nina

12 Hya xi camá ne, camatsejen cjuarcun xi sahmi sen ngajan ngahnga. Camatsejen ngu chjuun xi tixtêcun ran tsuhi. Hane sá ne, tacun ngahma rê ntsacu na. Hane ngu corona xi camá tsêhê tejó niñú ne, vêhê quitaha xten na. ²Hane chjuun jan ne, meje tsin quihndi ran. Jercu jindaya na ngatsê rê cjuahmu cojo cjuachoho tsêhê hacutjin tivatju ran. ³Hane camatsejen nga ngu sen ngajan ngahnga ta, camatsejen ngu yê xi jercu jyihi chu; hani xcusun ru. Chu jan ne, yatu má rcu chu, tê má ndyaja ru. Hane jima ngu rcu chu hincha sun ngu corona. ⁴Cojo ndetsihin chu ne cajavêjne chu

ngu cahndé tsêhê jyan cahndé rê niñú rê ngahnga, hane cacandi chu nangui. Hane yê jan ne, cafaña vasen chu xcun chjuun xi ha hindêya tsin quihndi ran cojo sa xi tsinguijne jingu chu quihndi rê na hora xi tsin. ⁵Hya xi camá ne, na vêhê ne, catsin rê na ngu quihndi xihin. Hane quihndi xihin jan ne, yaha bastón xi cuitexa me cojo yêjê ni nación cojo ngahñu cjua xi tjin rê me. Hane quihndi ran jan ne, cachjaha rê xcun Nina, ngajan xcun cahndé rcun rê me. ⁶Hane chjuun jan ne, cavanga na quiji na ngu xín. Ngu cahndé xi Nina tjin chjine rê me xi cumá ran. Hane ngajan sacu xi sinê na xcun ngu mil cojo jo cientu cojo jyanchan nixtin.

⁷Hya xi camá ne, cavetsihin ngu si ngajan ngahnga. Miguel cojo yahnga ángel ladu rê me ne, casahmi me si cojo yê xitsehen jan hacuaha cojo ángel ladu rê xitsehen. ⁸Hane cacaain rê yê jan cojo ángel ru, hacuaha catsichaja chu cahndé ru ngajan ngahnga. ⁹Vêhê xi caningatjen ru xcun ngasunhndê. Yê jan ne, jemu changá chu. Xitsehen xi matitjun o Satanás hmí ru. Chu ndacha chu, vindacha ru xuta ngasunhndê. Hane caningatjexin ru cojo ángel ru hiscan ngasunhndê.

¹⁰Hya xi camá ne, cahndê ngu xta xi jemu hñu cachja ngajan ngahnga cuitjin:

—Quihndê cavechu nixtin xi Nina cuaxêtje me xuta, camatsejen ngahñu rê me cojo gobiernu rê me. Hacuaha tsejen xi hñu cjua rê Cristu, me xi catsingatju me ta, cama catsingatjexin me chu xi

vinchajyé xingueen. Nixtin nixten cavinchajyé rè me xcun Nina naja, peru hindë tsajin. ¹¹Hane xingueen jan ne, cacaa rè quiji me xcun ngatsë rè jni rè Tsánga jan cojo ngatsë rè cjuaquixi rè me xi casua me tsëhë Nina ta, hacuiin machuvacacun me xi cjue xcun me cojo Nina handasa cjueya me. ¹²Hane ngatsë rè vëhë ne, icatama sua rè ngahnga cojo me xi siu xcun! Peru iay tsëhë nangui cojo ndachacun! ta, tsëhë xi canduva tjengui rè xitsehen xi matitjun. Hacuaha jemu quitsë rè cjuaxti tsëhë xi vëë xi nixtin rè ne, meje cuijnetaha. —Cuatjin cachja xta jan.

¹³Hya xi camachaya ru xi caningatjen ru nangui ne, cavetsihin cavanga cojo chu chjuun xi catsi ran quihndi xihin jan. ¹⁴Peru chjuun jan ne, cafahatsja na jo tyjunga rè chu jya xi jercu jyihi cojo sa xi cuma cuitjen na tsëhë chu yë hiscan cahndé xi tjin chjine xi cuma ran ngajan ngu xín. Hane ngajan sacu xi sinë na xcun ngu chan cojo jo chan cojo vasen chan, hane cuechiintaain chu yë na. ¹⁵Ngajan xi chu yë jan ne, cavaxë chu tsëhë hntsua chu nandá sacuaha ngu ndajyë cojo sa xi cuechutaha rè chjuun jan ne, cjue tyjava na cojo ngahñu rè ndajyë. ¹⁶Peru nangui ne, cavisecoo rè chjuun jan, hane caseya tsjuhun ne, cavingui rè ndajyë xi cavetju rè yë jan. ¹⁷Vëhë xi yë jan ne, jercu camaxti ru cojo chjuun jan hane sehe quiji casahmi chu si cojo tjë rè na xi cavangui. Casahmi chu si cojo xuta ran xi vetjo cjua xi cavitexa Nina hacuaha sua me cjuaquixi rè Jesús.

Yë xitsehen ne, casua chu ngahñu xi cjuahatsja chu chojyihí

13 Hya xi camá ne, cavejña chu yë jan tjehe ndachacun, hane cahvë xi ngu chu chojyihí ne, tivetju chu tsëhë ndachacun. Të má ndyaja ru hacuaha yatu má rcu chu. Hane të corona seya xcun ndyaja ru. Hane jima ngu rcu chu ne, yaja ngu ñihí xi tsitjungui rè Nina. ²Chu chojyihí xi cahvë vë ne, sacuaha ngu xa hindu jyë cuatjin jyihí chu, peru ntsacu chu cojo tsja chu ne, sacuaha ntsacu cojo tsja chu oso; hane hntsua chu ne, sacuaha hntsua chu xa sine cjan rè. Hane yë jan ne, casua chu vë ngahñu ru cojo cahndé rcun rè chu, hacuaha casua xa rè chu. ³Hane ngu rcu chu jan ne, casacuhmu rè hane tsejen xi tsajin rqui rè, ta cueya. Peru cojo yëjë sa ne, camandaja. Hane jingujyë ni xuta ngasunhdë ne, jercu quijircun rè me xi camandaja. Hane cojo cjuasua tjengui me chu. ⁴Hane xuta ne, caticjan xcun me cafararcu me chu yë jan ta, tsëhë xi casua yë cahndé xi vitexa chu. Hacuaha cafararcun me chu chojyihí jan. Cuitjin cachja me tsëhë chu:

—Ndastu yo xi cuechu xi cumá sacuaha chu vi. Ndastu yo cuma scaanya cojo chu. —Cuatjin cachja xuta tsëhë chu.

⁵Chu jan ne, casetaha ngu hntsua chu xi jemu cojo cjuaxta chja chu hacuaha tsitjungui ru Nina. Hane casacu ru cahndé xi cuitexa chu xcun xi yachan jo sá. ⁶Hane cavetsihin xi choho cachja chu

tsëhë Nina, canchati chu tsëhë ñihi rë cojo tsëhë cahndé hiscan viyuju Nina, hane tsëhë yëjë sa me xi siu me ngahnga. ⁷Hane cafahaxa chu xi sahmi si chu cojo xuta xi tyjahi cjuatacun rë me cojo me xi ndaja cjuinduju me cojo Nina. Hane caa ru cjue chu xcun. Hacuaha cafaha xa chu xi cuitexa chu xuta rë yëjë ni tjë, yëjë nandya, yëjë hne cojo yëjë nangui. ⁸Hane jinguyëjë me xi viyuju me ngasunhndë ne, cafaharcun me chu. Yëjë ni me xi tsajin ñihi rë me xcun xujun rë Tsánga rë Nina xi hisca ntsacu cavetsihin ngasunhndë ne, cavejña xi cueya. Tsajin ñihi rë me jan ta, tsajin rë me ngahña xatsë. Hane me vëhë cafaharcun me chu.

⁹Yo ngayun xi tjín nuju cjuasua xi cuinuhyun cjua vihi, ndaja tetuhuncun. ¹⁰Me xi satë rë xi cuma me presu, cuatjin cumá. Me xi satë rë me xi cueya me cojo quicha, cuetjucaa jain. Jinguyëjë rë vëhë ne, mameje rë xi xuta xi macjain rë me Nina ne, cjuecani rë xi cumacjain sa rë me.

¹¹Ngaxtun vëhë ne, cahvë nga ngu chu chojyihí, hane tivetju chu tsëhë nangui. Chu chojyihí xi majo ne, tjín jo ndyaja ru sacuaha tjín chu tsánga, peru chja chu sacuaha ngu yë jyë. ¹²Hane hacuaha cojo chu vëhë casatë rë chu ngahña xi casatë rë chu xicjin cojo ñihi ru. Hane casahmi chu vë xi yëjë ni xuta xi siu ngasunhndë ne, cjuaharcun me chu chojyihí xi tjún jan, chu xi handasa cueya chu xi casacuhmu rë ne, camandaja. ¹³Hane cama casahmi chu vë cjuarcun yehe cojo seña. Casahmi chu xi cuixu

ndihi tsëhë ngahnga, hane xuta ngasunhndë ne, cavutsejen me cjuarcun. ¹⁴Cuatjin cavindacha chu vë xuta ngasunhndë cojo cjuarcun xi cama casahmi chu ngatsë rë chu xi tjún. Hane cavitexa chu xi xuta ne, cuaxëtaha me ngu xcusun rë chu tjún jan xi casacuhmu rë cojo quicha peru cojo yëjë sa ne, quicun chu. Hane cuatjin casahmi me.

¹⁵Hane chu xi majo jan ne, casacu ru cahndé xi sua chu xta rë xcusun jan cojo sa xi cuma cuichja xcusun jan, hacuaha cuma sahmi xcusun jan xi cueya tu cutjin cjín me xi tsingatiin xi cjuarcun xcusun jan.

¹⁶Hane xcusun jan ne, casahmi ngu yëjë xi yëjë ni xuta ne, setaha ngu sellu tsja ladu quixi o sa xten me. Cuatjin casetaha rë xuta, sa quihndi, sa changá me, sa nchina, sa yuma me, sa xuta ndaya tjín o sa xi mosu hndixahan; yëjë ni me casetaha rë me. ¹⁷Hane chuva vëhë ne, sacuiin cahndé xteña hacuaha sacuiin cahndé cuatsë sa xi casetaain rë me sellu jan cojo ñihi rë chu chojyihí jan o cojo xqui rë letra rë ñihi ru.

¹⁸Cjuatacun vihi ne, tjín mé vijne, peru meje rë xi cuacjantaha me cjuatacun rë me ta cuitjin fi cjua: Catitsichuva me xqui rë chu jan ta, hatuxa xqui rë ngu xuta xihin. Hane xqui rë jan ne, jyan cientu cojo jyanchan jyun má.

Ngü cientu cojo yachan ñuju mil me xi cavatsë Nina

14 Hya xi camá ne, cavutsejen nga, hane ngajan secun Tsánga jan, secun quixi xcun naxi xi hmí rë Sion. Hacuaha siu cojo

me ngu cientu cojo yachan ñuju mil xuta xi casetaha xten me ñihi rë Tsánga jan cojo ñihi rë Nahmi rë me. ²Hacuaha canuhya rë ngu xta tsëhë ngahnga xi nuhya rë sacuaha fane jemu cjin nandan xi vanga o sacuaha xi jemu hñu faneya. Hacuaha nuhya rë sacuaha xi tsijane cha chjine arpa rë cha. ³Hane xuta jan ne, tisë me ngu sun xatsë xcun cahndé rcun rë Nina hacuaha xcun ñuju xcusun xi quicun cojo can ñuju xuta changá xi viyuju me ngajan. Hacuian yëjë me xi tjin rë me cahndé xi cuma rë me sun jan ta, suvá ngu cientu cojo yachan ñuju mil me xi cuacun jan xi cachaha rë me tsëhë ngasunhdë, me vëhë cuma rë me. ⁴Me xi cuacun vë ne, catsinguetsiin me cjuatacun rë me cojo yachjin, ta caviyuju suva me. Me xi cuacun vë ne, tjengui me Tsánga tu jani xi cjui. Me xi cuacun vë ne, hacuaha me xi cachjahaxin rë tsëhë ngajñi rë yahnga xuta xi cuma me sacuaha ngu cuatjo xi cumá rë Nina cojo Tsánga. ⁵Me xi cuacun vë ne, hisca xi ngu cjuandesu cavetjiiin tsëhë hntsua me; ta tsajin xi cún rë me.

Jyan ángel xi cachja hacutjin cumá cojo xuta xi faharcun rë chu chojyihí

⁶Sehe cahvë ngu ángel xi hacjahi xi vitjen vasencja rë ngahnga. Ángel vëhë ne, cjuecani rë cjuandajyihí rë Nina xi machuvaain ngahñu rë. Hane sua rë xuta ngasunhdë tsëhë yëjë ni nación, o tjë, o hne, o nandya xi cumachaya rë me cjua jan. ⁷Hane cachja cojo xta hñu cuitjin:

—Chjuhuncun rë Nina hacuaha nihñu jyë nihñu hnga me ta, tsëhë xi ha cavechu hora xi sahmicuenda me yëjë ni. Chjuhuncun me xi casahmi ngahnga cojo nangui cojo ndachacun cojo nanda yufa.

⁸Sehe tjengui rë me ngu ángel xi majo, hane cachja cuitjin:

—Camá cafë ngahñu cjua rë gobiernu xi vitexa rë nandya Babilonia. Xuta rë nandya jan ne, catsitsehen yahnga xuta tsëhë xi sacuaha catsichihi rë me cojo xan xi hacui cjuatsehen xi sahmi ngu xihin cojo chjuun xi hacuiin tsëhë.

⁹Sehe tjengui rë me ngu ángel xi majyan, hane cachja hñu cuitjin:

—Yo xi cjuaharcun rë chu chojyihí o sa xi cjuaharcun rë xcusun ru, hane setaha sellu ru xten o sa tsja me ne, ¹⁰xuta jan ne, tjin rë me xi cuihingui me xan xi hacui cjuacjan rë Nina, hane tsajin mé xi tsinguijne rë ngahñu rë cjuacjan jan. Xuta jan ne, cuatju me cjuahmu tsëhë ndihi tsëhë azufre xi seti, cuatjin cuatju me xcun ángel cojo Tsánga. ¹¹Hane nihndi rë ndihi rë cjuahmu rë me ne, cuiji yëjë nu yëjë nixtin. Sa nixtin sa nixten ne, sacuiin rë me cahndé cjuahajenda me tsëhë. Cuatjin cumá cojo me xi faharcun ru cojo xcusun ru. Cuatjin cumá cojo me xi siutaha rë sellu ru.

¹²Jinguyëjë rë xi vatju vëhë ne, mameje rë xi xuta xi macjain rë me Nina ne, cjuecani rë xi cuetjo me cjua xi cavitexa Nina hacuaha cumacjain sa rë me.

¹³Hya xi camá ne, cahndë ngu xta tsëhë ngahnga xi cachja cojo ná cuitjin:

—Nihndi cjuva vihi: “Xuta xi ha cueya me quihndé cojo nixtin xi sehe nduva ne, jercu ndaja tséhë me sa xi tjengui me ndiya rë Nina.”

Hasen rë Nina ne, chja tséhë me cuitjin:

—Juun, cjuahajenda me tséhë xi tsijenda rë me ta, tséhë xi cumatsejen chjí rë xa xi casahmi me. —Cuatjin chja Hasen rë Nina.

Ángel ne, fanga me xuta ngasunhdé xi saté rë me cjuacjan rë Nina

¹⁴Hya xi camá ne, cavutsejen ngu yufí tyava, hane xcun yufí ne, tacun ngu xi tsejen sacuaha quihndi rë xuta. Quisun rcu me ngu corona tséhë oro hane yahatsja me quicha yuju ta cuatë me xitjë. ¹⁵Ngajan xi cavetju nga ngu ángel tséhë ndava Nina hane hñu cajindaya cojo ángel xi tacun xcun yufí jan. Cuitjin cachja:

—Chjuhun quicha nuju nangun ta, ha cavechu nixtin xi xtí ta, tséhë xi camá quichji cosecha tséhë ngasunhdé.

¹⁶Hya xi camá ne, me xi tacun xcun yufí jan ne, cavaja me nangui cojo quicha rë me, hane tjë rë ngasunhdé ne, camá cachaya rë.

¹⁷Hya xi camá ne, hacuaha cavetju ngu ángel xi cavetju tséhë ndava Nina xi tacun ngahnga ne, hacuaha yaha ngu quicha yuju.

¹⁸Hane cavetju ngu ángel xi majo. Ángel vë ne, tacuntsja rë ndihi. Hane ángel vë ne, hñu cajindaya cojo ángel xi yaha quicha yuju. Hane cuitjin cachja cojo:

—Chehe quicha yuju riji ne, tiche yëjë hne rë uva tséhë xcun

ngasunhdé ta tséhë xi uva rë ne, jemu quichji.

¹⁹Hya xi camá ne, ángel jan ne, catsingatju quicha rë xcun nangui ne, cavatë rë uva xi hacui xuta tsehen. Hane cavincha rë cahndé hiscan xinune rë cojo sa xi cumatsyuhun ne cuetju nandá rë sacuaha saté rë matsyuhun cjuacjan rë Nina. ²⁰Camatsyuhun hiscan xín hitsë tséhë nandya, hane jemu cavetju jni hiscan camatsyuhun uva jan. Xi camiji jni ne, cavechutaha rë hiscan frenu rë chu naxin hacuaha cavanga ngu chuva rë jyan cientu cojo can kilómetro.

Yatu ángel xi siutsja cjuacjintacun

15 Hya xi camá ne, cahvé ngajan ngahnga ngu nga sen cjuarcun xi jemu fircun naja. Cahvé yatu ángel cojo yatu cjuacjintacun. Hane cojo cjuacjintacun jan ne, cuijnetaha cjuañihi xi cumá ta, sejyu cjuacjan rë Nina.

²Hacuaha cahvé sacuaha ngu ndachacun hasen sacuaha hasen ndyojo tsin, hane tsejen sacuaha tecjan cojo ndihi. Hane ngajan hinchacun xuta xi cacaa rë me quiiji xcun tséhë chu chojyih cojo xcusun ru cojo xqui rë ñihi ru. Secun me cojo arpa xi cafahatsja me tséhë Nina. ³Me vëhë ne, së me sun xi tséhë Moisés, me xi casahmi xa rë Nina hane hacuaha tséhë Tsánga. Cuitjin fi cjuva rë:

Jemu má nihñu xa, jemu fircun niji tséhë.

Nai niji ngayun. Ngayun, tsajin mé xi maji nihñu.

Quixi nújun, hacuaha chichihin
ndiya nuju.

Ngayun vitexun jinguyëjë ni
nación.

⁴ ¿Yo xi tsacjuuin nuju, tatá?

Tsajin yo.

Yëjë ni me sahmi jyë sahmi
hnga me yun ta tsëhë xi ngu
ni ngayun xi tyjahi cjuatacun
nuju.

Vëhë xi yëjë ni nación cuinduva
cuiticja xcun nuju tsëhë xi
cumatsejen ndaja xa cjuaquixi
nuju.

⁵Hya xi camá xi cavatju vihi ne,
cavutsejen nga ngahnga ne, hane
tixaha hiscan cahndé rcun rë ndihya
tsjian rë Nina hiscan hinchu acuerdu
xi camá cojo Nina. ⁶Hane tsëhë
ngajan ne, cavetju yatu ángel xi
cuacun jan xi siutsja me xa rë yatu
cjuacjintacun xi cumá. Ángel jan ne,
yaja tsjian rë nachjun ndaja xi ndaja
tyjahi. Hacuaha tjihñucja ndanisin
rë cojo cinturón tsëhë oro. ⁷Ngajan
xi ngu xi quicun jan xi ñuju má
ne, casua rë yatu ángel xi cuacun
jan ngu ngu tyucu rë oro xi ndaja
teya. Hane tyucu jan ne, quitsë rë
cojo cjuacjan rë Nina, Nina xi tacun
cuaha me yëjë nu yëjë nixtin. ⁸Hane
ndihya tsjian rë Nina jan ne, catsë rë
cojo nihndi xi nduva tsëhë cjuahasen
rë Nina xi seti cojo ngahñu rë me.
Cuatjin camá xi tsajin yo ma visehen
ngajan hisca xi cuijnetaha nixtin rë
cjuañihi xi yahatsja yatu ángel jan.

Tyucu xi hinchu cjuacjan rë Nina

16 Hya xi camá ne, cahndé
ngu xta hñu xi vetju tsëhë
ndava Nina hane cachja xta jan cojo
yatu ángel jan cuitjin:

—Tangun titejnu tyucu jan cojo
sa xi cjuacjan rë Nina ne, satë rë
ngasunhndë.

²Cojo vëhë ne, quiji ángel xi tjun
jan ne, cavitsingaxten rë tyucu
rë xcun nangui. Hane yëjë xuta
xi yaha me sellu rë chu hacuaha
faharcun me xcusun ru ne, casetaha
rë me ngu xcusun chíhin vetju xi
jemu cjan rë.

³Sehe ángel xi majo ne,
cavitsingaxten tyucu rë xcun
ndachacun. Hane ndachacun ne,
cavuya jni sacuaha jni rë ngu nima.
Ngajan cafë cahme xi hinchu rë
ndachacun.

⁴Sehe ángel xi majyan ne,
cavitsingaxten tyucu rë cojo sa xi
casatë rë nandan ndajyë cojo hiscan
xi vetjun nandá. Hane nandan jan
ne, hacuaha cavuya jni. ⁵Ngajan xi
cahndé xi cachja ángel xi tacuntsja
nandan jan cuitjin:

—Quixi yun chuva vihi. Ngayun
nechun cuaha, hacuaha cavinechun.

⁶Quixi yun chuva vihi ta
catsinguitsojo me jni rë xuta nuju
cojo profeta xi chja cjuu nuju. Hane
canicuyun chuva rë ta hacuaha
cavanga jni rë me.

⁷Hacuaha canuhya rë xi
ngasunscun rë yungun ne,
cafayangui cuitjin:

—Juun, cuatjin camameje rë. Tatá,
Nina yun, hane tu mé ni ne, ma
nuju. Jemu quixi cjuu xi vitexun.

⁸Hya xi camá ne, ángel xi má
ñuju ne, cavitsingaxten rë tyucu
rë xcun tsuhi. Ngajan casacu rë
ngahñu xi jemu cuaca rë xuta cojo
ndavá rë. ⁹Hane xuta ngasunhndé
ne, cati me cojo ndavá hñu. Peru
cahndé xi sahmi jyë sahmi hnga

me Nina ne, canchati me tséhë ñihi rë Nina, me xi vitexa me xcun yëjë cjuacjintacun vihi.

¹⁰Hya xi camá ne, ángel xi má hñu ne, cavitsingaxten rë tyucu rë xcun cahndé rcu rë chu jan. Hane ngajan camá xi nación xi sahmi chu gobiernu tséhë ne, jemu jñu camahani camá jingujyë ni. Hane xuta ne, cajinëne me neje me tséhë xi jercu má rë me. ¹¹Hane nchati me tséhë Nina rë ngahnga ngatsë rë cjuahmu rë me cojo tséhë nindu xi vetju yojo rë me. Nchati me tséhë Nina cahndé rë xi choho camá rë me tséhë cjuatsehen rë me.

¹²Hya xi camá ne, ángel xi má jyun ne, cavitsingaxten rë tyucu rë xcun ndajyë jyë xi hmí rë Eufrates. Ngajan xi nandan jan ne, caxiya hane camandaja ndiya rë cojo sa xi ma vatjucja rey xi nduva ladu vetjucaa tsuhi.

¹³Sehe cahvë jyan hasen tsehen xi cun sacuaha licuen, cavetju tséhë hntsua chu yë jyë jan, tséhë hntsua chu tjun cojo tséhë hntsua chu ndacha. ¹⁴Hane hasen jan ne, hacui hasen tsehen xi ma sahmi seña cjuarcun hacuaha hacui xi sahmi tangun rey, xuta matitjun rë jingujyë ni ngasunhndé cojo sa xi xuta jan ne, sahmi si condra rë Nina xi ma sahmi me yëjë ni hya xi cuetjucaa nixtin rë Nina.

¹⁵Tetuhunrcun cjuá rë Nina xi chja cuitjin: “Tjin chjine yun ta, tu ñahñu ni nduvá sacuaha nduva ngu chëjë. Jercu ndaja tséhë yo xi tacun quicun, sacuaha ngu me xi tacun chjine tsjian rë me xi cuaja me cojo sa xi tsajin yo sacutsejenté cjuasava rë me.” Cuatjin chja cjuá jan.

¹⁶Hane casahmi xi cama tangun rey jan ngajan ngu cahndé xi hne hebreo ne, hmí rë Armagedón.

¹⁷Hya xi camá ne, ángel xi má yatu ne, cavitejnu tséhë tyucu rë ngajñi tjo. Ngajan xi hiscan ndava Nina, hiscan cahndé rcun rë me, canuhya rë ngu xta hñu xi chja cuitjin:

—iHa camá cajnetaha!

¹⁸Ngajan xi sehe cavetsihin cavatë ndihi chuhun, cafaneya, catsinga chuhun, cojo xi jemu hñu cafani nangui. Hisca cjëë cjuani nangui cuatjin jinguyëjë rë xi caviyuju xuta xcun ngasunhndé ta, jercu cjuachan camahani cafani nangui. ¹⁹Hane ciudad jyë ne, jyan rquí caseya tsuhun. Hacuaha yahnga nandya rë ngasunhndé ne, cavixujne. Hane Nina ne, catsinguitsen me cjuatsehen rë nandya Babilonia jyë hane casahmi me xi hacuaha cuma rë nandya jan castigu tséhë cjuacjan rë Nina xi hinchá tyucu. ²⁰Hacuaha nangui xi vetju vasencja ndachacun cojo naxi ne, hya cafëya. ²¹Hane tséhë ngahnga ne, tsi ndyojo yehe cavixusun rë xuta jan. Hane chuva ngu tsi ndyojo vë ne, sacuaha yachan kilu hai. Hane xuta ne, canchati me choho cachja me tséhë Nina ngatsë rë cjuacjintacun tséhë tsi ndyojo jan ta, cjuacjintacun jan ne, jemu chircun camahani.

Hacutjin cjuë na xi viteña yojo rë

17 Hya xi camá ne, ngu tséhë yatu ángel jan xi yaha tyucu ne, canduva tjenguí ná ne, cachja cuitjin:

—Ndove ne, tsingácun ri castigu rë na xi viteña yojo rë, na xi tacun

na xcun jemu cjin nandá. ²Cojo na vèhè ne, rey tsèhè nangui ne, casahmi me cjuatsehen; hane xuta ngasunhndè ne, catsichihì rè me cojo xan xi hacui cjuatsehen ran. —Cuatjin cachja ángel cojo ná.

³Ngajan xi ángel ne, quijicojo ná ngajñi nguijña ngu cahndé xín. Hane ngajan cahvè ngu chjuun xi quisun na ngu chu chojyihì xi hani xi yatu rcu chu cojo tè ndyaja ru. Hane chu jan ne, yaha ñihì xi tsitjungui rè Nina. ⁴Chjuun jan ne, yaja na tsjian chacun xi moradu cojo hani. Hacuaha tsjian vèhè hisca seti jyihì cojo oro cojo ndyojo ndacun hane cojo tu seti xi cavaqui rè. Hane yahatsja na ngu tyucu tsèhè oro xi quitsè rè cojo xcusun tsehen cojo xi chocun rè cjuatsehen rè na. ⁵Hane xten na ne, camahindu cjuaviahi: “Ngu cjuaviahi xi meje rè cjuatacun: Babilonia, nangui xi matitjun. Nangui xi hacui na xi viteña yojo rè cojo yahnga xuta xi sahmi me cjuatsehen ne, fayanguì xuta xcusun rè na.” Cuatjin camahindu. ⁶Hane camachaya ná ta na vèhè ne, chihì na ta cahvì na jni rè nima xi cahme me ngatsè rè xi macjain rè me Nina cojo jni rè nima xi casua cjuaquixi rè Jesús.

Hane hya xi cahvè na ne, ngahan ne, jercu quijircu camahani ná.

⁷Ngajan xi cachja ángel cojo ná:

—¿Mé má fircun ri? Ngahan ne, suacuenda ri cjuatacunhma tsèhè chjuun jan cojo tsèhè chu chojyihì xi quisun na, chu xi tjìn yatu rcu chu cojo tè ndyaja ru. ⁸Chu chojyihì jan ne, quicun chu hatsèè, peru quihndè tsjain chu. Hane xi

cuinduvaniji chu tsèhè nduchin ne, jiya ndiya chu xi cjuèya chu. Hane xuta xi viyuju me ngasunhndè ne, me xi casetaain ñihì rè xcun xujun, xujun xi hisca ntsacu cavetsihin ngasunhndè, hinchà ñihì rè me xi satè rè me cjuahñu xatsè xi sua Nina ne, me vèhè cjuercun rè me. Cjuercun rè me hya xi scuèè me chu ta quicun chu hatsèè, tsjain chu quihndè, peru cuya cuejña nga chu.

⁹Mameje rè cjuatacun ta chjia nuhya rè, peru yatu rcu chu ne, nuhya rè xi má yatu ndetjun hiscan quisun na o sa nandya hiscan vitexa na jan. Hacuaha nuhya rè xi má yatu me xi vitexa ngajan.

¹⁰Hñu me vèhè ne, ha cajnetaha nixtin xi cavitexa me. Ngu nga me ne, tivitexa me. Hane ngu sa me jan ne, hya xi cuitexa me, sahmi ngu jyè xi hacuiin cjin nixtin scaa rè me. ¹¹Hane chu chojyihì xi quicun chu hatsèè, peru quihndè tsjain chu, cojo chu vèhè cuma jyìn me xi cuitexa me ngajan. Chu jan ne, ma jyìn, peru hacuiin xín cuinduva chu ta, tsèhè ngajñi rè me xi yatu jan ne, ngajan cuinduva chu hane cjuì hiscan cjuèya cha.

¹²Hane tè ndyaja ru xi cahye ne, hacui tè xuta xi cjèè cjuahatsja me xa xi cuitexa me. Hane me vèhè ne, sacu rè me cahndè xi cuitexa me tangun cojo chu, peru ngu hora ni cjuecani rè nixtin rè me.

¹³Hane me vèhè ne, cama sacuaha ngu ni cjuatacun rè me. Hane sahmi tangun me ngahñu rè me cojo gobiernu rè me sehe sua me xi cjuahatsja chu chojyihì. ¹⁴Hane hya xi sahmi me si cojo Tsánga jan, scaa rè xi cjue xcun Tsánga cojo

xuta xicjin. Hane xuta xicjin Tsánga ne, hacui me xi cavuxijin Nina, me xi ndaja finduju xi tjengui rë ta, Tsánga jan ne, Nai rë yëjë ni nai má me. Hacuaha vitexa me xuta xi vitexa. —Cuatjin cachja ángel cojo ná tséhë na vëhë.

¹⁵Cachja sa ángel cojo ná cuitjin:

—Sacuaha nandá xi cahye hiscan xi tacun na xi viteña yojo rë na, nuhya rë xi má xuta tséhë yëjë ni tjë, yëjë nandya, xuta cjín, xuta xi chja yëjë hne. ¹⁶Hane me xi sacuaha të ndyaja ru ne, cuya xi choho scuëë me na xi viteña yojo rë, tsismi me na, hacuaha cuejña cuatjin na. Hane xi cavejña suva na ne, sehe sinë chu yojo ran sehe cuaca ran cojo ndihi. ¹⁷Të me jan ne, cojo ngu ni cjuatacun meje sua me xa rë me cojo ngahñu cjuarë me xi cjuahatsja chu chojyih jan. Xi cuatjin casahmi me ne, camá hacuatjin cavincha Nina xahasen rë me xi cumá hisca nixtin xi cuma chihin hacutjin cavejñacacun Nina xi cumá. ¹⁸Hane sacuaha chjuun xi cahye jan ne, nuhya rë xi má ciudad rcun xi satë rë xi cumatitjun tséhë yëjë ni xuta xi vitexa xuta ngasunhndë.

Cjanengui nandya Babilonia

18 Hya xi cavatju vihi ne, cahvë nga ngu ángel xi nduvajne tséhë ngahnga xi jemu tjin rë ngahñu cjuarë. Hane nangui ne, casahasen rë cojo hasen rë ngahñu jan. ²Hane ángel jan ne, cojo ngu xta hñu cajindaya cuitjin: —iCjanengui! iCafë ngahñu rë Babilonia jyë! Quihndë suva machji rë tséhë xitsehen. Ngajan tsujyihya

hasen tsehen, ngajan vangui yëjë chu nisë xi jinë chu ngu xcusun chocun, chu xi chohovëë xuta chu. ³Cuatjin camá rë ta tséhë xi xuta ngasunhndë ne, cavincha sca rë me cojo xan rë cjuatsehen ran. Cojo na vëhë ne, me xi vitexa me ne, casahmi me cjuatsehen. Hacuanitjin tséhë xuta xi sahmi me negocio ta, camanchina me ngatsë rë cjuatsehen ran. —Cuatjin cachja ángel.

⁴Sehe cahndë nga ngu xta tséhë ngahnga xi cachja cuitjin:

—Ngayun xi xuta naha ne, tetjun tséhë nandya vihi. Tanganxun cojo sa xi cuajiin yun cuatjunxcun jyë rë, hane satiin nuju cjuañihi xi satë rë xuta vëhë. ⁵Jyë rë na xi hacui nandya vëhë ne, casexohnga rë hisca cavechu ngahnga. Hane Nina ne, cjuaha cuenda me tséhë cjuatsehen ran. ⁶Nicuyun tséhë na chuva xi casahmi na. Jo cuatjin vechutaha castigu xi cumá ran. Tiseccun rë copa ran jo cuatjin sa sehe hitsë sa cumá cjan xi cuma rë copa xi cavincha na tséhë xuta. ⁷Ngojo rë cjuaxta rë na xi jercu sahmi na mé xi fehya cjuatacun tsehen rë na ne, ndaja tuhun ran cjuañihi cjuachoho. Cuatjin cumá ran ta, cuitjin catsingatahacacun na cachja na: “Tejña cahndë rcun ta matitjun ngahan. Hacuiin cahan ngahan, satiin ná cjuachoho.” Cuatjin tsingatahacacun na. ⁸Vëhë xi xcun ngu ni nixtin, cuechutaha ran yëjë ni, ta cuechutaha ran cjuachoho, cuechutaha ran jindya. Hacuaha tsicjéya ran ndihi. Cuatjin cumá ta, tséhë xi Nina, me xi sahmi cuenda rë jyë ran ne, ma sahmi me yëjë ni.

⁹Ngajan xi xuta xi rcun xi casahmi cjuatsehen ngajan hacuaha casua cjuasua xahasen rë ngajan ne, scuëë me nihndi rë, hane squihnda me hacuaha cuiyuju va me. ¹⁰Hane cjuercun rë me ngatsë rë chircun xi tivatju ngajan, sehe squindaya me cuichja me cuitjin:

—iAy! Jercu choho cavatju ciudad ndajyihi, ciudad rcun. Tu ñahñu ni ne casatë rë yëjë ni cjuacjintacun xi cuma castigu rë.

¹¹Hacuaha xuta xi sahmi me negocio ne, squihnda me hacuaha choho cumá rë me tsëhë xi quihndë ne, tsajin yo cuatsë chaha xi viteña me, ¹²chaha xi camá tsëhë oro, tsëhë quicha tyava, cojo ndyojo ndacun, cojo tu seti, cojo tsjian ndacun sa lino sa seda, sa xcusun hani sa moradu. Chaha rë ya xi ndaja jne, chaha xi camá tsëhë nehñu elefante, o tsëhë ya xi hnga chjí rë o tsëhë quicha sine, quicha hinda o tsëhë ndyojo seti. ¹³Tsajin yo cuatsë rë chaha rë canela cojo yahnga xcusun xi sahmi xi ndaja chinë comida o sa tyjungunsa, sa balsamo xi hmí rë muro, sa vinu, sa aceite, sa ndyaja, sa chu tsánga, sa naxin o sa carreta, sa mosu cachaha rë xi hacui cjuahñu rë xuta. Tsajin yo cuatsë tsëhë me. ¹⁴Cuitjin chja tsëhë nandya jan:

—Xcusun ndacun xi jercu cafehya xahasen riji ne, quijixin tsijin. Yëjë ni cjuanchina riji xi ndajyihi ne, cafëya, hane tsajin nu tsajin nixtin cuya sacu ri.

¹⁵Ngajan xi me xi caviteña ngajan hane cojo vëhë cama nchina me ne, cjuercun rë me ngatsë rë chircun xi tivatju ngajan, xinchacun me cjin

tsëhë, hane squihnda me hacuaha choho cumá rë me. ¹⁶Cuitjin cuichja me tsëhë:

—iJemu va jyihi nandya! Camá ngu nandya jyë, jemu ndacun tsjian catsicaja rë xuta rë. Tsjian ndaja xcusun hani moradu. Tsjian xi cavaqui rë nachjun oro cojo ndyojo ndacun cojo tu seti. ¹⁷Peru xcun xi ngu hora ne, cafë cavetsunya cjuanchina vë.

Hane yëjë me xi matitjun xi vitexa tsëhë barcu cojo xuta xi hincha me cahntsua, cojo cha xi sahmi xa xcun barcu o sa xuta xi sahmi negocio cojo, cumamijí sahmi tiña me tsëhë. ¹⁸Squindayava me hya xi scuëë me nihndi rë xi seti hane cuichja me cuitjin:

—Hatuxa tsajin sa ngu ciudad xi cuanitjin ndajyihi sacuaha camá ciudad jyë vi.

¹⁹Hane cuitejnu me scuan rcu me ta jemu choho má rë me hacuaha squihndava me cuichja me cuitjin:

—iCojo cjuatsehen rë xuta nandya vi! Ngatsë rë cjuanchina rë me ne, tu yo ni me xi tjin rë ngu barcu rë chaha ne, cama nchina me. Peru ngu ñahñu ne, cavetsunya.

²⁰Catamasua nuju tsëhë na, ngahnga. Catamasua nuju ngayun xi tyjahi cjuatacun nuju, ngayun xi má apóstol cojo ngayun xi má profeta. Catamasua nuju ta hindë casahmi Nina castigu na, casahmi cuenda me tsëhë na chuva xi casahmi na cojo nuju.

²¹Ngajan xi ngu ángel xi jercu tjin rë ngahñu ne, cafaha me ngu ndyojo jyë chuva rë natsi rë molinu, hane catsingatjeya rë ngajñi ndachacun. Sehe cachja cuitjin:

—Chuva ngahñu vihi, cuanitjin ngahñu xi cjuinengui cojo nandya jyë xi hmí rë Babilonia. Hane tsajin nixtin xi cuya cumá. ²²Tsajin nixtin xi cuinuhya rë xi tsijane cha chjine arpa ngajan, o sa ngu sun, o sa fane chiruvi o sa fane tyjo. Hisca ngu cha chjine tsëhë tu mé ni xcusun ne, cuyaain sahmi xa ngajan. Hacuaha cuyaain nuhya rë ndyojo rë molinu xi sahmi scuan rë pan. ²³Ndihi rë ngu lámpara ne, cuyaain tsejen hasen rë ngajan. Tsajin nu tsajin nixtin xi ngajan cuma cjuavixan. Cuatjin cumá cojo ta, xuta xi casahmi me negocio ngajan ne, jemu hñu cjua rë me cojo yëjë ni xuta ngasunhdë. Hane cavincha sca me xuta ne, cavindacha me cojo xcusun rë me.

²⁴Hacuaha ngajan cavanga jni rë profeta cojo tsëhë xuta xi tyjahi cjuatacun rë me xcun Nina cojo jni rë yëjë ni xicjin me xi camá catsiquehen me nguehe ngasunhdë.

Xutacjín xi cuaxëndaja me Nina

19 Hya xi camá cavatju vihi ne, cahndë sacuaha xta rë xutacjín ngajan ngahnga xi chja cuitjin:

iCatama jyë, catama hnga Nina!
Nina ne, vaxëtje me xuta, tjín rë me hasen ndajyihi xi seti, hacuaha ma sahmi me yëjë ni.

²Jemu quixi cjua xi vitexa me ta, casahmi me xujun jyé rë na xi caviteña yojo rë, na xi hñu cjua na.

Na vëhë ne, catsinguetsun na cjuatacun rë ngayëjë ni cojo cjuatsehen rë na.

Hane Nina ne, casahmingojo me cojo rë na jni rë xuta xi sahmi xa rë me. Jni rë me xi casahmi na xi cavanga.

³Sehe cavuya cachja me cuitjin:

—iCatama jyë, catama hnga Nina!
ta, nihndi ran ne, miji nchunchujun ni, nu nu ni.

⁴Ngajan xi can ñuju xuta changá cojo catsiñuju xcusun xi quicun ne, caviticja xcun Nina xi cjuaharcun rë me xi tacun me cahndé rcun.

Cuitjin cachja me:

—iCuatjin jain! iNihñu jyë nihñu hnga Nina!

⁵Sehe cavetju tsëhë cahndé rcun ngu xta xi chja cuitjin:

Nihñu jyë nihñu hnga Nina,
ngayun xi nihñu xa rë me.

Nihñu jyë hnga me sa quihndi sa changá yun.

⁶Hya xi camá ne, cahndë sacuaha xi tisë xutacjín. Nuhya rë sacuaha fane nandan xi jemu hñu vanga o sacuaha faneya xi tsinga chuhun. Hane cjua rë ne cuitjin chja:

iCatamajyë catamahnga Nina naja ta, ha cavetsihin sahmi me gobiernu hane ma sahmi me yëjë ni!

⁷Catamasua naja. Tahan cjuasua xahasen naja. Nihña jyë hnga me tsëhë xi cavechu cjuavixan rë Tsánga.

Chjuun rë ne, ha catsindaja na yojo ran.

⁸Casacu rë na cahndé. Hane cuaja na tsjian ndaja xi seti, xi tyjahi.

Tsjian jan ne, hacui xcusun ndaja xi sahmi xuta xi tyjahi cjuatacun rë me xcun Nina.

Cuatjin cachja xutacjín jan.

**Sinēsuhi me tsēhē
cjuavixan rē Tsánga**

⁹Hya xi camá ne, cachja ángel cojo ná cuitjin:

—Nihndi cjua vi: “Jercu ndaja tsēhē me xi camachaya rē xi nduva me sinēsuhi me tsēhē cjuavixan rē Tsánga.”

Hane cachja sa ángel cuitjin:

—Cjua xi cachjá ne, cjuaquixi jain rē Nina.

¹⁰Hane ngahan ne, caticjátaha ntsacu ángel xi cjuahárcun rē. Peru cachja cojo ná cuitjin:

—¡Xicanihñii! ta, tangun ni chjí naja, ta xa naha ne, tangun cojo xa xi nihñu cojo xingun xi sua cumachaya rē cjuaquixi rē Jesús ne, hacui xa xi vitexa Nina. Nina ne, me vēhē chjuhuncun me.

Hacuaha cjuaquixi rē Jesús ne, vēhē sacuaha cacun rē cjua xi cachja profeta.

Me xi quisun rē naxin tyava

¹¹Sehe cahvē xi tixaha ngahnga, hane ngajan ne, cahvē ngu chu naxi tyava. Hane me xi quisun rē chu ne, chja tsēhē me ta, sahmi chihin me cjua rē me hacuaha quixi me. Jemu quixi cjua me hya xi tsichuva me xuta cojo sa xi hya xi sahmi me si. ¹²Tuxcun me ne, sacuaha ndihi xi ña vitjen. Rcu me ne, jercu hinchasun corona. Hane camahindu ngu ñihi rē me xi tsajin yo vēē rē, peru suva me vēē me.

¹³Yaja me ngu tsjian xi tjtintē ni ne, xi caseyaquinda cojo jni. Hane sacuaha ñihi rē me ne, Cjua rē Nina hmí rē me. ¹⁴Hane tjengui rē me sindadu cjín tsēhē ngahnga.

Sindadu jan ne, cuaja me tsjian ndaja xi tyava, xi tyjahi. Hane hacuanitjin hinchasun me naxin tyava. ¹⁵Hane suva me ne, tsēhē hntsua me ne, vetju ngu quicha yuju xi cuanguihmu rē xutacjín. Hane hacuiin yuma cumá rē me xuta ta, cuitexa rē me cojo yaxti rē quicha. Hane sune me cahndé hisca nune rē uva cojo sa xi cuaxē me xan rē cjuacjan rē Nina, me xi ma sahmi yējē ni. ¹⁶Hacuaha xcun tsjian rē me cojo tyjuhmi rē me ne, camahindu ñihi vi: “Me xi matitjun tsēhē ngayējē ni xi matitjun. Me xi matitjun tsēhē ngayējē ni xi vitexa.”

¹⁷Hane cahvē xi ngu ángel ne, secun xcun tsuhi. Hane jindayahñu tsēhē nisē xi jemu hnga vitjen chu. Cuitjin cachja cojo chu:

—Nduvun. Catamatangun yun tsēhē suhi jyē rē Nina. ¹⁸Ngajan xinu yojo rē xuta xi camatitjun, cojo yojo rē capitán rē sindadu cojo yojo rē xuta xi hñu cjua, cojo yojo rē chu naxin cojo yojo rē xuta xi caxinchasun rē chu. Xinu yojo rē xuta, sa ndaya tjin me o sa xi caxteña me, sa langa me, sa changá me, xinu yojo rē me. —Cuatjin cachja me cojo chu nisē jan.

¹⁹Hane cahvē chu chojyihí jan cojo xuta xi vitexa me cojo sindadu cjín rē, hane camatangun cojo sa xi sahmi si cojo me xi hinchasun chu naxin tyava jan. ²⁰Hane ngajñi si vēhē ne, cachjaha rē chu chojyihí jan camá presu chu. Hacuanitjin ne camá presu chu xi casahmi cjuarcun ngatsē rē chu chojyihí cojo sa xi cavindacha chu xuta sehe setaha sellu rē chu xten me hacuaha faharcun me xcusun

ru. Sehe cacandiya quicu me catsijo chu ngajñi ndachacun xi ti cojo azufre. ²¹Hane xicjin chu xi cavangui ne, catsiquehen me cojo quicha xi vetju tsëhë hntsua me xi miji rë naxin. Sehe yëjë ni nisë ne, cajnësua chu hisca xi cavechu rë xahasen ru cojo yojo rë xi cuicun vi.

Ngu mil nu xi seyahnü xitsehen

20 Sehe cahvë ngu ángel xi nduvajne tsëhë ngahnga, hane yahatsja ángel vë llavi tsëhë nduchin hacuaha yahatsja ngu cadena jyë. ²Hane cafaha rë yë jyë jan. Chu vëhë ne, hisca hatsëë tacun chu. Chu vëhë ne, hacui naain o sa Satanás. Hane xi cafaha rë chu ne, catsihñu rë chu cojo cadena xcun xi ngu mil nu. ³Hacuaha catsingatjenya ru cahntsua nduchin. Sehe casechjahñu tingotjo rë cojo llavi hane casetaha xcun ngu sellu. Cuatjin camá cojo sa xi sacuiin sa cahndé cuindacha ru xutacjín hisca xi cuijnetaha ngu mil nu. Hane xi cuatju vëhë ne, cumandaya nga chu ngu jo nixtin.

⁴Hya xi camá ne, cahvë cahndé rcun hane xcun silla jan ne, siu me xi casatë rë xa xi cuitexa me. Hacuaha cahvë hasen rë me xi catisun rë rcu ngatsë rë cjuaquixi rë me xi casua me tsëhë Jesús hacuaha ngatsë rë cjuarë Nina. Me vëhë ne, cafarucuaain rë me chu chojyihí cojo xcusun ru, hacuaha casetaain rë me sellu rë chu sa xten me o sa tsja me. Hane cahvë xi cavuya nga cjuahnü rë me sehe cojo Cristu casahmi me gobiernu

xcun ngu mil nu. ⁵(Yahnga nima ne, cuyaaín cjuahnü hisca xi cjuë mil nu jan.) Matsejen ta vëhë nixtin xi tjun cuya cjuahnü rë nima. ⁶Jercu ndaja tsëhë me hacuaha tyjahi cjuatacun rë me xi cojo me satë rë me xi tjun cuya me cjuahnü. Cjuaveya xi majo ne, satiin rë me ta, tsajin mé ma sahmi cojo me. Cumá me sacuaha nahmi xcun Nina cojo Cristu hane sahmi me gobiernu cojo me xcun ngu mil nu.

⁷Hane xi cuijnetaha mil nu jan ne, cumandaya nga Satanás tsëhë ndavaya hiscan caveya me. ⁸Sehe cuya cuindacha xutacjín rë jingujyë ni ngasunhndë, cuindacha me xuta rë Gog cojo xuta rë Magog, cojo sa xi sahmitangun rë tsëhë si. Hane xqui rë me xi cumatangun me ne, cuechu sacuaha tsumi tjeheh rë ndajyë. ⁹Hane xi camatangun me condra jan ne, cjue me jingujyë ni xcun nangui. Hane ngajñi si ne, cuiyujuhndee rë me cahndé xi siu sindadu cjín rë Nina cojo nandya xi tsihmucacun me. Peru ndihi ne, cuijne tsëhë ngahnga hane cjue cueti xuta condra jan.

¹⁰Hane Naain xi cavindacha rë ne, ningatjenya rë ngajñi laguna tsëhë azufre xi seti. Hane ha cuanitjin ne catundiya chu chojyihí jan cojo chu xi cavindacha. Hane ngajan ne, cuatju chu cjuañihí nixtin nixten, nu cjui, nu nduva.

Camacuenda tsëhë nima xcun cahndé rcun tyava

¹¹Hya xi camá ne, cahvë nga cahndé rcun tyava xi matitjun cojo me xi tacun xcun. Hane ngatsë rë cavatjuxcun me, cafëya nangui cojo

ngahnga, hane casacuiin cahndé xi cuma rë. ¹²Hacuaha cahvë nima. Sa changá, sa quihndi, hinchacun yëjë ni nima xcun cahndé rcun jan. Hya xi camá ne, ngu jo libru ne catuxaha. Hacuaha catuxaha ngu libru xi hacjahi. Hane libru vëhë ne, libru rë cjuahñu. Sehe camacuenda tsëhë, sacuaha xcusun xi casahmi nima, hacutjin xi camahindu xcun libru tjun. ¹³Ndachacun ne, casua nima xi tjintsja. Cjuaveya cojo tsjun ne, hacuaha casua nima xi tjintsja. Hane jima ngu nima ne, camacuenda tsëhë hacutjin xcusun xi casahmi me. ¹⁴Hya xi camá ne, tsajin sa cjuaveya, tsajin Hades, cahndé xi viyuju nima ta, catundiya ngajñi laguna xi seti cojo ndihi. Hane ndihi vëhë ne, hacui cjuaveya majo. ¹⁵Ngajan xi nima xi casetaain ñihi rë me xcun libru tsëhë cjuahñu ne, cavixuya ngajñi laguna tsëhë ndihi jan.

**Ngahnga cojo ngasunhndë
ne, camá xatsë**

21 Xi cavatju vëhë ne, cahvë ngu ngahnga xatsë cojo ngu ngasunhndë xatsë ta, tsëhë xi ngahnga xi tjun cojo nangui xi tjun ne, cafëya. Hane sacuaha ndachacun ne, tsajin. ²Hane ngahan, Juan, cahvë nandya xi catsinchacun Nina xi hmí rë Jerusalén xatsë. Canduvajne tsëhë Nina ngajan ngahnga. Jemu ndaja tsejen nandya vë ta, tsejen sacuaha ngu na xi cuixan xi canicaja rë na tsjian ndajyihí tsëhë xi nduva cha xi cuixan cojo rë na. ³Sehe cahndé ngu xta hñu xi cachja tsëhë cahndé rcun. Cuitjin cachja:

—Ha quihndë cjue cuiyuju tangun Nina cojo xuta. Hane xuta jan ne, cumá xuta rë me, hane suva me ne, cumá me Nina rë me. ⁴Hane Nina ne, tsixiya me yëjë ndatuxcun me. Quihndë tsajin sa cjuaveya. Tsajin sa cjuachoho. Tsajin mé má squihnda me. Tsajin cjuahmu. Cuatjin cumá ta, tsëhë xi xcusun changá ne, ha cavatju.

⁵Hane me xi tacun xcun cahndé rcun ne, cachja me cuitjin:

—iTisahme xatsë yëjë ni xcusun!

Hane cachja me cojo ná cuitjin:

—Nihindi cjua vihi ta, hacui cjuaquixindaja hane macjain naja tsëhë.

⁶Hane cachja sa cojo ná cuitjin:

—Ha camachihin. Sacuaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Me xi xinda rë xahasen rë me ne, tu cuatjo ni suá cuihi me tsëhë nandá xi sua cjuahñu xatsë. ⁷Me xi scaa rë cjue xcun ne, sacu rë me cjuatjo rë Nina. Hane cumá ngahan Nina rë me, hacuaha cumá me quihndi naha. ⁸Peru yo xi tsacjun, yo xi macjaain rë, yo xi hngacacun, cha tsiquehen, me xi sahmi cjuatsehen ngajñi xihin o sa ngajñi chjuun, o xi sahmi surqui, o xi faharcun nina ndacha, o xi chjaain me cjuaquixi ne, yëjë ni me vëhë ne, sacu rë me cahndé ngajñi laguna tsëhë ndihi xi ti cojo azufre. Hane vëhë ne, hacui cjuaveya xi majo.

**Hacutjin jyihí ciudad xatsë
xi hmí Jerusalén**

⁹Hane ngu ángel tsëhë yatu jan xi yahatsja tyucu të xi quitsë rë cojo

yatu cjuacjintacun xi vijnetaha jan ne, canduvatjengui ná ne, cachja cojo ná cuitjin:

—Ndove ta, tsingácun ri na xuta vixan, na xi camá chjuun rē Tsánga.

¹⁰Hane ángel jan ne, quijicojo ná ngajñi nijña naha hiscan ngu ndetjun naxi hnga. Sehe catsingacun ná nandya xi catsinchacun Nina, nandya xi hmí rē Jerusalén ta tinduvajne tsēhē Nina ngajan ngahnga. ¹¹Hane ña tsejen xi seti cojo hasen tsēhē ngahñu rē Nina, hisca sua hasen rē sacuahá ngu ndyojo seti xi yufa sacuahá ndyojo tsin. ¹²Hane cavindee rē ngu xondyojo teya hacuahá hnga. Tejó má tingotjo rē, hane jimangu tingotjo jan ne, ngajan siu ngu ángel. Hacuaha ngajan camahindu ñihi rē tejó tjē rē xuta nangui Israel. ¹³Xondyojo jan ne, tjin jyan tingotjo jimangu ladu. Jyan má ladu vetjucaa tsuhi. Jyan má ladu ngatihin. Jyan má ladu canangui. Hacuaha jyan má ladu vetje tsuhi. ¹⁴Xondyojo rē ne, tacun xcun tejó xihndē naña. Hane xihndē naña ne, yaha ñihi rē tejó apóstol rē Tsánga xi camahindu xcun.

¹⁵Ángel xi chja cojo ná ne, yaha ngu ya naxu tsēhē oro xi machjirēhē sacuahá ya chuva xi cjuahachuva rē nandya cojo xondyojo cojo tingotjo rē. ¹⁶Nandya jan ne, cuadradu jyihi. Jimangu tjeheh rē ne, jo mil jo cientu kilómetro má xi nduju. Hane hacuanitjin ne má xi hnga. ¹⁷Hane catsichuva xondyojo rē. Vēhē tjin rē ngu cientu cojo yachan ñuju nda sacuahá chuva rē xuta ta vēhē casahmiza ángel cojo.

¹⁸Sacuaha xondyojo rē ne, camá cojo ndyojo seti xi hmí rē jaspe, hane nandya ne, suva oro camá hane seti sacuahá ndyojo tsin.

¹⁹Xihndē naña rē xondyojo rē nandya ne, camá cojo ndyojo seti rē yējē ni xcusun xi sacuahá xcusun rē yejña. Xihndē naña rē xi tjun ne, camá tsēhē jaspe. Xi majo ne, tsēhē zafiro. Xi majyan ne, tsēhē ágata, má ñuju ne, tsēhē esmeralda, ²⁰má hñu ne, tsēhē ónice, má jyun ne, tsēhē cornalina, má yatu ne, tsēhē crisólito, má jyin ne, tsēhē berilo, má ñaja ne, tsēhē topacio, má tē ne tsēhē cirsopraso, má tengu ne, tsēhē jacinto, hane má tejó ne, tsēhē amatista. ²¹Sacuaha tejó tingotjo jan ne, camá tsēhē tu seti xi hmí perla. Hane jimangu tingotjo camá tsēhē ngu perla. Hane ndiyatē rē nandya jan, tsēhē suva oro camá peru sacuahá ndyojo seti xi ña hasen tsejen.

²²Ngajan ciudad vēhē ne, cahveen ngu yungun. Mamijí rē ta tsēhē xi ngajan cuiyuju Nina, Nai naja xi ma sahmi me yējē ni, cojo Tsánga xi hacui me sacuahá yungun.

²³Cuanitjin ne, mamijí rē tsuhi cojo sá xi sua hasen rē ta, tsēhē xi hasen rē ngahñu rē Nina ne, sua hasen rē ngajan, hane Tsánga ne, má ndihi rē. ²⁴Yējē xutacjín ne, tsujyihya me cojo ndihi vē xi cjue me cojo ngasunhdē rē me, hane xuta matitjun rē me ne, ngajan cjue cani me ngahñu rē xa xi vitexa me cojo xi cuaxëndaja me. ²⁵Ngajan hisca xi ngu nixtin ne, sechjaain tingotjo rē, tsēhē xi ngajan ne, tsajin nixtin cuma nguixun. ²⁶Hane xutacjín tsēhē ngasunhdē ne, cjue cani me

ngahñu cjuarë me cojo cjuanchina rë me. ²⁷Hatuxa tsajin cahndé xi cuma rë tu mé ni xi hacuiin tyjahi xcun Nina. Tsajin yo xi sahmi cjuatsehen, tsajin yo xi cuichja ndesu. Suva ni me xi casetaha ñihi rë xcun libru rë Tsánga, libru xi yaha ñihi rë me xi sacu rë cjuahñu xatsë ne, me vëhë sacu rë me cahndé.

22 Sehe ángel ne, catsingacun ná ndajyë xi hacui nandá xi sua cjuahñu. Nandá vëhë ne, nandá yufa xi hasen sacuaha ndyojo tsin. Hane nandá vëhë ne, vetju tsëhë cahndé rcun rë Nina cojo Tsánga, ²hane vanga taha ndiyatë cavasen nandya. Xingu xingu ladu tsëhë ndajyë ne, secun ya tsëhë cjuahñu. Ya vëhë ne, tejó ndiya xi ngu nu tjin chan tsëhë tu rë ta, chuva sá sua tu rë. Hane xca rë ya ne, machjirëhë xi tsirqui rë xutacjín jan. ³Ngajan ne, tsajin mé xi chohovëë Nina tsëhë. Ngajan nandya vë tacun cahndé rcun xi tsëhë Nina cojo Tsánga. Hane ngajan ne, me xi tacun xi xa rë me ne, cjuahacuenda rë me. ⁴Scuëë me xcun Nina, hane ñihi rë Nina ne, setaha xten me. ⁵Mamijí rë ndihi, sa ndihi rë lámpara o sa tsëhë tsuhi ta, Nina Nai naja ne, sua rë me hasen rë me. Hacuaha gobiernu xi sahmi me ne, cjuecani rë yëjë nu, yëjë nixtin.

Camatiña nixtin xi cuya Jesucristu

⁶Hya xi camá ne, cachja ángel jan cojo ná cuitjin:

—Cjua vihi ne, cumacjain nuju tsëhë ta, quixi jain. Nina, Nai naja ne, catsingatju me ángel rë me xi

sua cumachaya rë hasen rë xuta xi chja cjua rë me tsëhë xcusun xi xati cumá.

⁷Chja cjua ta:

—Tuhuncuendun xi ngutjen cuinduvá. Jercu ndaja tsëhë xuta xi vetjondaja me sahmichihin me cjua rë libru vihi xi chja tsëhë xcusun xi sehe cumá.

⁸Juan hmí ná. Cahndé, hacuaha cahvë xcusun vihi. Hane hya xi camá cahndé cahvë ne, caticjaxcun taha ntsacu ángel jan xi catsingacun ná xcusun vihi ta, cjuaharcun ángel jan. ⁹Peru cachja ángel cuitjin:

—iXicanihñii! ta, tangun ni chjí naja, ta xa naha ne, tangun cojo xa xi nihñu cojo xingun xi má profeta cojo yahnga xingun xi vetjo me cjua rë libru vihi. Nina ne, me vëhë chjuhuncun me.

¹⁰Hacuaha cachja me cuitjin:

—Xicavisaniin sellu cjua xi sehe cumachihin xi hinchu libru vihi, ta nixtin rë ne, ha meje cuechu.

¹¹Cuejña xi xuta xi choho sahmi me ne, catjinduju xi choho sahmi me, hane xuta tsehen ne, catjinduju me cojo cjuatsehen rë me, hacuanitjin ni xuta xi quixi me ne, catjinduju me cojo ndiya rë cjuaquixi, hane xuta xi tyjahi cjuatacun rë me, catjinduju me cojo ndiya rë cjuatacun tyjahi.

¹²Chja me cuitjin:

—Tuhuncuendun xi ngutjen cúa. Hane xi cúa ne, nduva cojo chjí nuju. Suá rë jimangu me chuva rë hacutjin xi casahmi me. ¹³Ngahan ne, sacuaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin

ne, hacui ni ngahan xi vijnetaha. Tejña hisca ntsacu cavetsihin yějē ni, hane tejña cuaha hya xi cjuē. Matitjun, matjengui ngahan.

¹⁴Jemu ndaja tséhē xuta xi catsityajahi me tsjian rē me cojo sa xi sacu rē me cahndé xi siné me tséhē ya rē cjuahñu xatsē. Xi cuatjin ne, cuma cuisehen me taha tingotjo rē nandya jan. ¹⁵Peru xuta tsehen cuiyuju me ndatsen cojo xuta xi sahmi cjuasurqui, o xi sahmi cjuatsehen ngajñi xihin o sa ngajñi chjuun, o xi tsiquehen, o xi faharcun nina ndyojo o me xi tsihmucacun cjuandacha. Yějē ni me véhē cuiyuju me ndatsen nandya.

¹⁶—Ngahan, Jesús ne, catsingátju ángel naha xi tsinguixi xcun ngayun xuta yungun cjuaquixi vihi. Ngahan ne, tjē rē David má ngahan. Quihndindaicjin rē David má ngahan. Niñú seti tséhē nguitajñu má ngahan. —Cuatjin chja Jesús.

¹⁷Ngajan xi Hasen rē Nina cojo na xi cuixan cojo Tsánga ne, cjuayangui me cuitjin:

—Nduvun.

Hacuaha me xi cuihndē cjuá véhē ne, cuichja me cuinitjin ni:
—Nduvun.

Sa xi xinda nuju ne, nduvun. Sa xi cjuayatacun ne, siuhun tu cuatjo ni nandá rē cjuahñu.

¹⁸Suá cumachaya nuju ngayun xi visiñuju cjuá rē xujun vihi xi sehe cumachihin ta, sa xi tjin yo xi cuesuntaha sa cjuá cojo cjuá xi camahindu nguehe, Nina ne, cuesúntaha me cjuañihi xi camahindu xcun xujun vi.

¹⁹Hacuanitjin ne, sa xi tjin yo xi cjuahataha rē cjuá vihi xi sehe cumachihin, Nina ne, cjuahaxin me cahndé xi cumá rē me xcun xujun rē cjuahñu cojo tséhē nandya xi catsinchacun Nina cojo tséhē xcusun ndaja xi camahindu xcun libru vihi.

²⁰Hane me xi sua cjuaquixi xi cuicun vi ne, chja me cuitjin:
—Hatuxa nduva xati.

Cuatjin chja me. Cuatjin ndatjin. Nduvun, Tatá Jesús.

²¹Quihndē ne, catisatē nuju cjuandaja rē Nai naja, Jesucristu. Cuatjin jain cumá.